

Ammasumik ataatsimiinnermi oqaluuserisassat:

Imm. 01 Oqaluuserisassat akuersissutigineri

Aningaasaqarnermut tunngasut

Imm. 02 Ukiup kvartal-ip siulliani Sisimiuni Ilinniartitaanermut immikkoortorta pillugu aningaasaqarnikkut nalunaarussiaq.

Imm. 03 Akia, meeqqerivik pinngortitarlu, Sisimiut.

Imm. 04 Atuarfinni nerisaqartitsineq

Imm. 05 2021-mut missingersuutitut ukiunullu missiliuuteqarfiusunut missingersuutitut kissaatit

Imm. 06 Silami timersornikkut atortulersuutitnik agguataarineq.

Suliassat nalinginnaasut

Imm. 07 Ilinniartitaanermut ataatsimiititaliap 2020-mi maajimiit decembarimut ataatsimiittarnissanut ullussatut nutaatut siunnersuut.

Imm. 08 Illoqarfinni atuarfinni aamma Kangaamiuni Kangerlussuarmilu atuarfinni nakkutillineq

Imm. 09 Meeqqat atuarfiini atuartut atuanngitsoortartut pillugit nassuiaat

Paasissutissiissutit

Imm. 10 SUKORSEQ aqqissugaanik klubbini aqutsisut sunngiffinnilu pisortat 12. & 13 februar 2020 Isumattorsaqatigiinnermi peqataanermit ilisimatitsissut

Imm. 11 Sisimiuni & Maniitsumi sunngiffimmi atuartitsinerup ineriartornera pillugu paasissutissiissut

Imm. 12 Qeqqata Kommuniani Kultureqarnermut sunngiffimmullu immikkoortortamut Ukiumut nalunaarut 2019.

Imm. 13 Maniitsumi Sisimiunilu Majoriap ataani kollegiet ingerlanneqarnerannut nalimmassaanermi killiffimmik paasissutissiissut.

Imm. 14 Qeqqata Kommuniani suliffissaaleqineq pillugu paasissutissiissut

Imm. 15 Tamalaat.

Ataatsimiinneq aallartippoq nal.:08:30

Peqataasut:

***Siumut Frederik Olsen, Evelyn Frederiksen, Ruth Heilmann
Atassut Siverth K. Heilmann***

Inuit Ataqtigiit Carl Christian Olsen Imm. 5-mi iserpoq.

Nalunaaruteqarlutik peqataanngitsut:

Nalunaaruteqaratik peqataanngitsut:

Imm. 01. Oqaluuserisassat akuerineri

**Aalajangiineq:
Oqaluuserisassat akuerineqarput.**

Aningaasaqarnermut tunngasut

Imm 02 Ukiup kvartal-ip siulliani Sisimiuni Ilinniartitaanermut immikkoortortaq pillugu aningaasaqarnikkut nalunaarusiaq.

Journalnr. 06.01.02

Tunuliaqutaq

Ilinniartitaanermut Immikkoortortap kvartal-ip siulliup 2020-imi missingersuutitigut malinnaatitsineq matumuuna saqqummiuppaa.

Maleruagassatigut tunngavigisaaq

Qeqqata Kommuni karseqarnermut naatsorsuuserinermullu malittarisassat.

Ilinniartitaanermut ataatsimiititaliap pisinnaatitaaffiinut tunngatillugu inatsisit atuuttut.

Pissutsit atuuttut

Atuineq kvartal-ip siulliani ukiumut tamarmiusumut 2020-mut agguataarneqassaguni atuineq 24,99 procentimiissaaq.

Maannakkumut aningaasartuutaasut inissititernerat suli iluarsartuunneqarluni ingerlavoq, takuneqarsinnaavorlu ilaatigut Igloo Mountain ataasiinnaanngitsuni inissititserneqarsimasooq. Iluarsartuussineq suli ingerlavoq, inissititinerillu aaqqinneqassallutik. Atuarfeqarfimmut aningaasartuutit ataatsimoortut maannakkumut qaammammut akissarsiat siumoortut kingumoortullu aammalu tiimimusiallillu tamarmik ataatsimut naqinneqarsimapput aamma taanna aaqqiniarlugu suliaq ingerlavoq taamaattumik 305%-mik qaangiisumasutut isikkoqarallartut inissisimavoq, kontomi allami atuinertut isikkoqarmata. Taamaattumik atuinermik takussutissiinermi taamaallaat maluginiaqqunarput ataatsimut isigalugu atuisimanermik takussutissiisutit.

Marsi 2020-mi atuineq kisitsisinut eqqortunut aaqqinneqarpoq.

Imaqarniliaq Ilinniartitaanermut ataatsimiititaliap Maj-ip. 04-ani 2020-imi ileqquusumik ataatsimiinnera
04/2020

Konto 571 – Ilinniartitaaneq Sisimiut + Nunaqarfiit.

Udvalg for Uddannelse	Budget	jan-20	feb-20	mar-20	Forbrug ialt i perioden	Forholds-mæssigt Forbrugs %	Rest forbrug %
571020100 SIS Fritid Stab	2.665.000		241.829	3.352	245.181		91%
571020201 SIS Musikskole		123.163	155.096	88.997	367.255		
571020202 SIS Ungdomsskolen Sisimiut	1.610.000	18.292		868	19.161		99%
571020203 SIS Fritidsundervisning Sisimiut	310.000		12.346	47.245	59.591		81%
571020204 SIS Fritidsundervisning Kangerlussuaq	86.000	347	27.364	13.209	40.920		52%
571020205 SIS Fritidsundervisning Sarfannguit	78.000				-		100%
571020206 SIS Fritidsundervisning Ililleq	46.000		1.278	2.557	3.835		92%
571020301 SIS Sukorsit Sisimiut	2.644.000	291.146	246.911	225.048	763.105		71%
571020302 SIS Svømmebadet Sisimiut	792.000	6.232	150		6.382		99%
571020303 SIS Fritidsklub Kangerlussuaq	1.220.000	55.801	72.457	113.161	241.419		80%
571020304 SIS Skolepasning Kangerlussuaq	543.000	52.512	40.029	47.690	140.232		74%
571020305 SIS Skolepasning Sarfannguit			4.845		4.845		
571020401 SIS Kultur og Folkeoplysningafd	590.000	58.636	3.889	48.139	110.664		81%
571020402 SIS Amerloq	207.000	7.158	9.504	22.374	39.037		81%
571020501 SIS Bibliotek Sisimiut	1.297.000	123.489	108.095	85.421	317.005		76%
571020502 Bibliotek Kangerlussuaq	151.000	12.727	11.285	9.185	33.197		78%
571020503 SIS Bibliotek Sarfannguit	16.000	2.650	1.531	1.881	6.062		62%
571020504 SIS Bibliotek Ililleq	16.000	223	425	350	998		94%
571020601 SIS Lokalmuseum Sisimiut	1.958.000	152.274	161.518	183.122	496.915		75%
571020801 SIS Tilskud F-K formål Sisimiut	8.845.000	810.191	1.069.909	1.177.255	3.057.355		65%
571020802 SIS Tilskud F-K formål Kangerlussuaq	77.000				-		100%
571020803 SIS Tilskud F-K formål Sarfannguit	243.000	1.832	77	-123	1.786		99%
571020804 SIS Tilskud F-K formål Ililleq	202.000	8.103		7.305	15.408		92%
571020901 SIS Idrætshallen Kangerlussuaq	1.951.000	80.461	67.448	102.338	250.246		87%
571030100 SIS Skole Stab			14.500		14.500		
571030200 SIS Skoleforvaltning	2.597.000	676.661	722.869	582.425	1.981.956		24%
571030301 SIS Minngortuunnguup Atuarfia	32.372.000	3.717.863	2.369.530	2.551.348	8.638.741		73%
571030302 SIS Nalunnguuarfiup Atuarfia (Skole 2)	33.717.000	3.387.222	2.234.012	2.720.184	8.341.418		75%
571030303 SIS Qinnuata Atuarfia Kangerlussuaq	8.153.000	620.027	502.996	617.822	1.740.846		79%
571030304 Skole Sarfannguit	2.314.000	284.110	171.618	210.919	666.648		71%
571030305 SIS Skole Ililleq	1.879.000	161.617	130.467	137.446	429.529		77%
571040100 SIS Dagsinstitutioner Stab	617.000	365.668	391.552	361.958	1.119.178		-81%
571040201 SIS Nuka Sisimiut	4.538.000	388.504	408.314	348.275	1.145.094		75%
571040301 SIS SISI Sisimiut	3.703.000	245.128	220.204	248.330	713.662		81%
571040401 SIS Naasoq Sisimiut	3.242.000	238.340	279.213	219.525	737.077		77%
571040402 SIS Sikkersoq Sisimiut	3.219.000	303.697	285.153	295.687	884.537		73%
571040501 SIS Naalu Sisimiut	4.354.000	399.639	346.068	466.388	1.212.095		72%
571040502 SIS Naja/Aleqa Sisimiut	3.481.000	326.207	261.693	263.486	851.386		76%
571040503 SIS Ungannuuaq Sisimiut	3.453.000	299.845	275.622	274.572	850.038		75%
571040504 SIS Nuniaffik Sisimiut	4.557.000	433.304	505.566	358.393	1.297.264		72%
571040505 SIS Kanaartaq Sisimiut	4.511.000	433.448	378.594	419.377	1.231.419		73%
571040506 SIS Uiaq Sisimiut	4.514.000	379.468	366.763	313.599	1.059.830		77%
571040507 SIS Nuka Kangerlussuaq	4.018.000	293.013	286.691	311.028	890.732		78%
571040601 SIS Nasunnguuaq Sarfannguit	1.331.000	96.529	81.990	74.180	252.699		81%
571040602 SIS Nuunu Ililleq	1.205.000	94.369	120.427	107.809	322.605		73%
571040603 SIS Kommunal Døgnpleje	1.114.000	81.586	51.824	71.930	205.340		82%
571050100 SIS Qeqqani MISI (Psykolog)	3.628.000	273.574	286.449	213.436	773.459		79%
571060100 SIS Majoriaq Stab	4.759.000	180.959	84.972	170.180	436.111		91%
571060200 SIS Kollegium Sisimiut	369.000	16.393	29.643	-68.417	-22.381		106%
571060300 SIS Nutaalliorfeeraq værkstedsforløb		69.856	-43.720	216.219	242.355		
571060400 SIS Arbejdsmarkedsområdet	7.154.000	393.222	733.361	440.921	1.567.504		78%
Udvalg for Uddannelse udgifter i alt	170.346.000	15.965.487	13.732.359	14.106.395	43.804.241		74%

Meeqqeriviit Sisimiut + Nunaqarfiit.

Meeqqerivinni ataatsimut isigalugu ukiumut peqqumaatissanut aserfallassimasunullu inniminniinerit qaammatit siulliit atornerqarput, ukuusunut eqqiaanermut atortussanik inniminniinnerit, saniatigullu illullu iluani atortuusut allat aserfallassimasut ukiup aallartinnerani taarsersorneqarput.

Atuinerit tamarmik aningaasaliissutaasunut qaangiingillat taamaattumik ukiup sinneranut inniminneeqqinnissaq tamakkikannilerlutik inniminniinerat meeqqerivinni tamani.

Atuarfeqarfiit Sisimiut + Nunaqarfiit.

Minngortuunnguup Atuarfia:

Ukiumut atuartsinermut atortussanut kiisalu akissarsianut atuinerit aningaasartuutit atornerqarput. 10 klassertut misilitsinnissaata unitsinneqarnera atuartinneqarneratalu ilaneqarnera peqqutaallutik, atuinerit annertusiallapput.

Nalunnguarfiup Atuarfia:

Nalunnguarfiup Atuarfiani atuneq 24,7 procentimiippoq, ajunngilluinnartumik inissisimalluni. Ilisimasat naapertorlugit, Nalunnguarfiup Atuarfia kvartal siullermi innaallagissamut kiassarnermullu annertuumik aningaasartuuteqartarpoq.

Nalunnguarfiup Atuarfiani kvartal-ip aappaani atuartsinermut atortussanik pisineq aningaasartuutaangaatsiassasoq naatsorsuutigineqarpoq.

MISI:

Sulilluni angalaneq pivoq Januar 2020-mi aningaasartuutaasussannut ukiup sinneranut sinniisoqanngilaq, aammalu allaffimmi atortussanik inimiiniineq pivoq aammalu aningaasartuutissat iluanni sinniisoqarani.

Sunngiffimmi sammisassaqaqtitsineq Sisimiut nunaqarfiillu.

Atuagaateqarfeqarneq katersugaasiviillu

Atuinerit akissarsianut atortussanullu aningaasartuutit aningaasaliissutinut naleqquttumik ingerlapput

Sukorsit:

Eqqiaanermut atortussanik ukiup sinneranut atugassanik siumoortumik inniminniinnermut aningaasartuuteqangaatsiarput, aammalu illup iluani iigaq qalipanneqarnera aningaasartuutini annerusunut ilaavoq.

Silaannalunna peqqutaalluni eqqiaanermut aningaasartuutit annerupput, taamaaliluni atuiffinnit assigiinngitsunit nuussinerit ingerlanneqarsimallutik.

Nipilersornermik ilinniarfik:

Maannakkumut aningaasartuutit nalinnginnaasut kisimik ingerlapput

Kultur-imut tunngasut Sisimiut + Nunaqarfiit.

***Imaqarniliaq Ilinniartitaanermut ataatsimiititaliap Maj-ip. 04-ani 2020-imi ileqquusumik
ataatsimiinnera
04/2020***

Ukiup nutaap aallartinneraniit maannakkumut timersornermut tunngasunut suli Qeqqata Kommunia tapiissuteqanngilaq.

Majoriaq

ERP program-imi ajornartorsiuteqarneq peqqutaalluni, Majoriami atuinerit nalinginnaasumit appasinnerupput.

Taamaamat pisarnermit atuinikinneruvoq. Kukkussutip aaqqinnissaa utaqqivarput nalinginnaasumik pisisinnaaniassagatta.

Innersuussut:

Ilinniartitaanermut ataatsimiititaliamut innersuussutigineqarpoq 2020-mi kvartal siullermi aningaasaqarnermut nalunaarusiaq tusaatissatut tiguneqassasoq.

Aalajangiineq:

Tusaatissatut tiguneqarpoq.

Ilanngussat:

Imm. 03 Akia, meeqqerivik pinngortitarlu, Sisimiut.

Journal nr. 09.01

Tunuliaqutaq

Akiani immikkoortoq C18-imi meeqqerivimmik nutaamik sanaartorneq, meeqqerivik akuleriisitsilluni meeqqeriviusaaq, meeqqanut 64-inut inissaqartitsisoq, meqqat 40-it pingasuniit arfinillit tikillugit ukiullit ininut marlunnut agguataarlugit, meeraaqqallu ukioqanngitsuniit pingasut tikillugit ukiullit 24-t ininut marlunnut agguataakkat.

Maleruagassatigut tunngavigisaaq

Qeqqata Kommuniaq karseqarnermut naatsorsuuserinermullu malittarisassat.

Sanaartornermut malittarisassat 2006

Meeqqerivinnik pilersitsinermut, ilusilersuinermit, aqutsinermut ingerlatsinermullu Namminersornerullutik oqartussat ilitsersuutaat.

Qeqqata Kommuniata pilersaarusiornermut periusissiaa, anguniakkat 2018 - 2022: Meeqqat ineriartornissaanni pitsaasumik sinaakkuteqarneq - "Meeqqerivinni init meeqqanut tamanut pitsaasumik atugassaqartitsisut qulakkeerusuppagut"

Pissutsit atuuttut

Meeqqerivik nutaaq 650 m²-mik annertussuseqassaaq, meeqqerivik qaamasoq ammasorlu. Suliariumannittussarsiuussereernerup Aningaasaqarnermullu ataatsimiititaliap akuersissuteqareernerata kingorna 2022-imi januaarip 19-ani tunniuttussanngorlugu sanaartornissamut 2019-imi decembarip 19-ani entreprenørinik isumaqatigiissusiortoqarpoq. Qaartiterineq aallartinneqareerpoq. Covid- 19 aamma timmisartoqqusinninneq patsisaalluni tunniussinissamut piffissaq kinguartinneqarsinnaavoq. Ingerlanneqalernerani 2020-mi missingersuusiortiusuni pissaaq, meeqqerivimmik ingerlatsinermut missingersuutissat Uiaq assigisussaallugit. Ilanngussaq 1.

Sulisut amerlassusilerneqarnerisa qaffanneqarnerat aammalu 2021-mut missingersuusiornermi pequtiniq pisinissaq suliarineqarpoq.

Akiani meeqqerivimmik nutaamik sanaartornermut ilanngullugu meeqqerivik Sisi-ip matuneqarnissaa aammalu sulisut pequtillu nuunneqarnissaat pilersaarutaaqaarnikuuvoq. Meeqqerivinnut utaqqisut allattorsimaffiata allannguuteqarnera patsisaalluni Sisi matuneqassanersoq imaluunniit maannakkut utaqqisunut allattorsimaffik naammassiniarlugu ingerlaannassanersoq isummerfigineqassaaq.

Meeqqerivik Sisi, kingusinnerusukkut akuleriisitsilluni meeqqeriviusoq 1969-iminngaanneersuvoq, meeqqanut 52-inut inissaqartitsisoq meeqqanut 1½-3 ukiulilit akornannut meeqqanut 12-inut, pingasuniit arfinillit tikillugit ukiulinnut 40-nut inissaqartitsisoq. Meeqqat ininut pingasunut ataatsimoorussamk sammisassaqaqfilimmut agguataagaapput. Sulisut amerlassusiligaanerit imaappoq aqutsisoq, tullersorti inimi perorsaasutut aamma atuuffeqartoq perorsaasullu marluk, isumaginninnermi ikiortit pingasut, ikiortit pingasut, asaasoq, kiisalu igaffimmioq erruisartuutigisisoq ullup aaffaa sulisartoq.

Sisi illup iluatigut silataatigullu iluarsartuunneqarnissamik pisariaqartitsivoq.

Atuilluartuunissakkut kingunerisinnaasai

Innuttaasunut Akiani najugaqartunut atorneqarsinnaasumik Akiani meeqqeriveqalernissaa atuilluartaunissakkut kingunerisussaavaa.

Aningaasaqarnikkut allaffissornikkullu kingunerisinaasai

2022-mit ukiunullu tulliuuttunut ingerlatsinissamut sulisut amerlassusissaat ingerlatsinermullu missingersuutit naleqqussarneqassapput. Uiap 2020-mut ingerlatsinermut missingersuutai 4.514 mill. koruuniupput. Uiaq meeqqanut 64-inut inissaqartitsiovoq sulisullu amerlassusiligaanerat 14-iuvoq aamma Akiani meeqqerivik nutaaq taamatut annertussusiligaassaaq. Akiani meeqqerivik nutaami meeqqanut amerlassusiliineq pingasuniit arfinillit tikillugit ukiulinnut 40-nut, ukioqanngitsuniit pingasut tikillugit ukiullinut 24-nut, meeqqat katillugit 64-it. Sulisut amerlassusilikkat makkuussapput: Aqutsisoq, tullersorti, immikkoortotami aqutsisoq ataaseq, perorsaasut marluk, isumaginninnermik ikiortit sisamat, ikiortit sisamat, eqqiaasoq ataaseq igaffimmiorlugu ullup affaani sulisartoq.

Meeqqerivimmuut nutaamut meeqqerivik Sisi-mik ingerlatsineq ilaatinneqassanersoq imaluunniit Sisi atuartussalerivittut ingerlaqqissanersoq pillugu isummertoqassaaq. Tamaattumik siunnersuutit marluk saqqummiunneqarput:

1. Sisi Akiani meeqqerivimmuut nutaamut nuunnissaa

2020-mi qaammatini pingasuni siullerni utaqquisunut allattorsimaffiup takutippaa, meeqqerivimmi inissanik 21-nik amigaateqartoqartoq, taanna utaqquisut allattorsimaffianni takuneqarsinnaavoq. Sisi Akianut nuussappat, meeqqerivimmi inissanik aamma meeraaqqerivimmi inissanik suli amigaateqartoqassaaq. Meeraaqqerivimmi inissanik 33-nik meeqqerivimmilu inissanik 14-inik suli utaqqisoqassaaq.

	04-02-2020	04-03-2020	01-04-2020
Meeraaqqeriviit	24	26	26
Inissat	0	0	0
Meeqqeriviit	21	19	21
Inissat	0	0	0

Sisi-mi meeqqat amerlassusiligaanerat aamma sulisut amerlassusiligaanerat kiisalu ingerlatsinermut missingersuutit Akiani meeqqerivimmuut nutaamut nuutsinneqarpata, perorsaasup ataatsip, isumaginninnermi ikiortip ataatsip ikiortillu ataatsip akissarsiassaanut ingerlatsinermi missingersuutit 800.000 koruuninik qaffanneqarnissaanik kinguneqassaaq.

Sisi-mi atortut pequtillu 20-t sinnerlugit pisoqaassuseqarput aammlau meeqqanut pingasuniit arfinillit tikillugit ukiulinnut taamaallaat naatsorsuussaallutik, soorluttaaq pinngussat ukiorpassuarni atorneqarnerminngut nungullarsimasut. Silami pinnguaatit ikittuinnaapput. Sisi qanoq sivisutigisumik piussanersoq nalornissutigineqarnikummat, pequtinut nutaanut aningaasaliisoqarnikuunngilaq.

Sisi-mi meeraaqqerivittassaa pilersinneqalermat, nerrivinnik issiavittalinnik marlunnik 10.000 koruunilinnik pisisoqarnikuuvoq.

Pitsaassuseqarluartut sivisuumik piunerusarput, nerrivinnik, issiavinnik, ilitsivinni, pinngussanik inimut ataatsimut pisiniaraanni 125.000 koruunit atorneqartussapput, perusuersartarfinni meeqqanut inissamik allanillu pilersitsisoqassaaq. Qarasaasiaqarnikkut atortunut, silami pinngussanut,

Imaqarniliaq Ilinniartitaanermut ataatsimiititaliap Maj-ip. 04-ani 2020-imi ileqquusumik ataatsimiinnera 04/2020

meeqqanut ineriartornermi ajornartorsiutilinnut ini maluginiutinik atortulik pilersinneqassaaq. Tamaasa pisiarinissaanut katillugit 500.000 koruunit aningaasartarissavai. Taamaattumik sulisut paarlaannissaannut ataasiartumik aningasartuutinik kiisalu ininut sisamanut inimut ataatsimut atortunik 125.000 koruuninik nalilinnik pisinermik kinguneqassaaq.

Sisimiut	2020	Utaqqisut allattorsimaffiat/inissat 2020	Sisi ilanngunnagu Akiani 2021-mi inissat	Maanna kisitsisit malillugit utaqqisut allattorsimaffiat/inissat
Meeraaqqerivimmi inissat	204	26/0	216	14/0
Meeqqerivinni inissat	230	21/0	218	33/0
Angerlarsimaffimmi paarsisartuni inissat	16			

Sisi-p missingersuutaanik nuutsilluni, Akiani meeqqerivimmik nutaamik aallartitsinissamut 2021-mut missingersuutit inississorneqarnerat

Atuiffiup normua	Taagutaa	Aningaas.
	Qaammammut akissarsiassat	800.000
	Sulisut taarseraanneri	50.000
	Atortut/pequtit	500.000
Sisi	Ingerlatsineq	3.703.000
Katillugit		
	Ingerlatsineq	5.053.000

2022-mi januaarip 19-ani atuutilersitsinermi, Akiani 2021-mut missingersuutinut atatillugu 700.000 koruuninik ataasiartumik aningaasaliinerit ilanngunneqassapput. Meeqqeriviup atulinnginnerani qaammatit marluk sioqqullugit atorfinitsinneqartussanut aqutsisumut tullersortimullu akissarsianut 150.000 koruunit kiisalu nutaanik atorfinitsitsinernut atorneqartussanik sulisut paarlakaanneranni 50.000 koruunit atorneqassapput. Aqutsisoq tullersortilu pequtilersussapput allaffissornikkullu suliassanik ingerlatsissallutik, meeqqeriviullu naammassinerani 2021-llu naalernerani atulernissaanut meeqqerivimmi sulisussanik atorfinitsitsisussaallutik.

Ukiunut missiliuuteqarfiusunut 2022-mut Akia-nut missingersuutit

Atuiffiup normua	Taagutaa	Aningaas.
	Ingerlatsineq	4.514.000

2. Meeqqerivik Sisi atualertussaleriffittut

Sisimiut	Meeqqerivinni inissat 2020	Utaqqisut allattorsimaffiat/inissat 2020	2021-imi Sisi-mik Akia-nillu	Maanna kisitsisit malilugit utaqqisut

Imaqarniliaq Ilinniartitaanermut ataatsimiititaliap Maj-ip. 04-ani 2020-imi ileqquusumik ataatsimiinnera 04/2020

			meeqquvimmii inissat	allattorsimaffait/ini ssat
Meeraaqquvinnii inissat	204	26/0	228 (angerlarsimaffimmi paarsisartut ilanngunnagit)	2/0
Meeqquvinnii inissat	230	21/0	270	0/19
Angerlarsimaffimmi paarsisartuni inissat	16	16	16	0/3

Sisi atuartussalerivittut allannortinneqarnissaa aalajangiunneqarpat, meeraaqquvinnii inissanik sulii amigaateqalaartoqassaaq. Ungasinnerusooq isigalugu aamma angerlarsimaffimmi paarsisartoqarneq atorunnaariartorneqarsinnaavoq.

Sisi nuutsinnagu 2021-mi pilersitsinermut Akia-nut aningaasat ataasiartut

Aqutsimut tullersortimullu akissarsiat	150.000
Sulisut taarsaanneri	50.000
Atortut/pequtit	500.000
Katillugit	700.000

2022-mi januaarip 19-ani atuutilersitnermi, Akiani 2021-mut missingersuutitut atatillugu 700.000 koruuninik ataasiartumik aningaasaliinerit ilanngunneqassapput. Meeqquvinnii atulinnginnerani qaammatinik marlunnik sioqqutsilluni atorfinitsinneqartussant aqutsisumut tullersortimullu akissarsianut 150.000 koruunit kiisalu nutaanik atorfinitsitsinernut atorneqratussanik sulisut paarlakaanneranni 50.000 koruunit atorneqassapput. Aqutsisoq tullersortilu pequtilersussapput allaffissornikkullu suliasanik ingerlatsissallutik, meeqquvinnii naammassinnerani 2021-llu naalernerani atorlernerissaanut meeqquvinnii sulisussanik atorfinitsitsissusaallutik.

Meeqquvinnii Sisi atorunnaarsinneqarnerani kisianni Maniitsumi Aanikasittut atuartussaleriffittut allannortinneqarpat, Sisi-mi inini pingasuni meeqquvinnii atualertussanut 60-inut inissanik pilersitsisoqassaaq, meeraaqquvinnii inissat Akia-nut nuutsinneqarlutik. Sisi sisamanik initaqarpoq, inii sisamaat sammisaqarfittut atorluni. Inii taanna perorsaanikkut sammisaqartitsinermut sungiusartarfittullu atorsinnaavoq. Aasat tamaasa juulimi aggustimilu meeqquvinnii atualertussat atuartussaleriffimmut nuutsinneqartassapput, tamannalu meeqquvinnii 60 missaanut inissamik pilersitsissaaq. Meeqquvinnii meeqquvinnii atualertussat qassiunersut apeqquutaavoq.

Maniitsumi Aanikasimmit misilittakkat:

Piareersareernerup kingorna Aanikanik 2015-imi aggustip aallaqqaataani 10. klassimi atualertussanut samminerusumik perorsaanikkut inerikkiartuutaasumik meeqquvinnii ammarpoq. Aanikasimmut siunertaanikuvoq atualertussat piginnaasanik ineriartortitsinissaq, inooqataanikkut malitseqartitsinikkullu aamma meeqquvinnii ataasiakkaat ineriartornerisa, atuarfimmut piareersimanerisa

aamma piareersimanerisa nalilersorneqarnissaat pilugu perorsaataasumik inerikkiartuutaasumik anguniakalimik suliaqartumik neqeroorfigineqarnissaat. Ukiumut pilersaarummik ineriartortitsisoqarnikuuvoq, taanna angajoqqaat, perorsaankkut sulisunik, MISI aamma persorsaankkut ataqatigiissaarisoq suleqatigalugit nalimmassarneqarlunilu tulluarsarneqartarpoq. Qaninnerpaatut ineriartornermut killiffik, inooqataanikut sungiusarneq aamma meeqqat atualernissamut atortunik sungiusartinneqarnerannik, oqaatsinik pinnguarnermik atualernissamullu piareersimanerunissaannik perorsaankkut periutsit nutaanerpaat malillugit sulisoqartarpoq. Meeqqanut atuarfimmi misiliinissaannut aqqissuussisoqartarpoq, taamaalillutik atualernissamut piareersarneqarlutik, atuarfimmik sinaakkutaanillu misigisaqarlutik, ilinniartitsisussaminnik ilisassinnittarlutik.

Aanikasimmi sulisut misigivaat, meeqqat ukioqatitik naapikkaangamikkit, ineriartornissamut ilinniarnissamullu qaninnerpaap iluanni ineriartornissamut, meeqqat ineriartornissaannik suliaqarneq oqinnerusartoq. Sulisunik pikkorissaasarsimaneq, perorsaankkut sulinermut iluaqutaasarsimavoq. Ineriartorneq pillugu nassuiaatit pitsaallutillu atorsaapput. Sulisut atualinnginnermi misilitassanik aamma angajoqqaanik suleqateqarnermi malitseqartitsinerni assigiinngitsuni sulisut isiginiarnerusutut ippoq. Aammattaaq meeqqanik immikkut pisariaqartitsisunik pingaartitsisoqarpoq, taamaalilluni atuarfik tiguisussaq, atuartoq angajoqqaallu eqaannerusumk ikaarsaarnermik, suilatigut inooqataanikkullu. Angajoqqaanut ersarissarneqassaaq, perorsaarnermik suliaqarnermit anguniakkat aallaavigalugit sulisoqartarmat, angajoqqaarpasuummi suli isumaqarput, meeqqat meeqqerivimmi paariinnarneqartartut. Pitsaasumik sunniuteqarsimavoq, ilisimasallu amerliartortillugit pitsanngoraluttuinnarluni. Perorsaankkut ataqatigiissaarisoq sulisunik suleqateqarluni ukiumut pilersaarusiornikuuvoq, taanna Sisi-mi nutaami atuutilersinneqarsinnaavoq.

Sisi meeqqerivittut atualertussaasivittut

Atuiffiup normua	Taagutaa	Aningaas.
	Ingerlatsineq	3.703.000

Sulisut amerlassusiligaaneranni ingerlatsinermilu allannguisoqassanngilaq. Sulisut aqqanilinnut amerlassusiligaapput meeqqanullu tallmanik arfinilinnillu ukiulinnut 60-inut meeqqat amerlassusiligaapput.

Allaffeqarfiup naliliinera

Soorlu ilanngussami 2-mi takuneqarsinnaasoq ukioqanngitsuniit tallimat tikillugit ukiullit meeqqat amerliartorput. Ukiuni kingullerni marlussunni ilinniartoqarfinnik arlalinik Sisimiunut pisoqarnikuuvoq, ilinniartut amerlasuut meeraqarput aammalu ilinniarnermi meeqqat nassartarlugit.

Akia aallartinnerani Sisi atorunnaarsinneqassappat, meeqqerivinni inissat inissanik aqqaneq-marlunnik ikilisinneqassapput meeraaqqerivinni immikkut inissani taamaallaat aqqaneq-marluusuni utaqqisunut 33-iussatut naatsorsuutigisaasumut.

Sisi meeqqerivittut ikaarsaarfittut pilersinneqarpat, utaqqisut nungungajassapput.

Angerlarsimaffimmi paarsisoqarneq atorunnaariartortinneqarsinnaavoq. Taamaattumik allaffeqarfiup innersuussutigivaa, Sisi paariinnarneqarluni meeqqerivittut atuartussalerivittut allanngortinneqassasoq.

Innersuussut

Allaffeqarfiup Ilinniartitaanermut ataatsimiititaliamut, Aningaasaqarnermut ataatsimiititaliamut Kommunalbestyrelsimullu siunnersuutit tullinguttut marluusut arlaat akuerissagaat innersuussutigivaa.

1. AKIA-ni meqqerivimmik atuilernermi SISI atorunnaarsinneqassasoq - aningaasallu Akia-nut nuunneqassasut. Akia-nut 2022-mut ukiunullu missiliuteqarfiusunut ingerlatsinermut missingersuutinik pilersitsisoqassasoq.
2. Sisi paariinnarneqassasoq meeqqerivittullu atuartussalerivittut allanngortinneqassasoq. Akia-nut 2022-mut ukiunullu missiliuteqarfiusunut ingerlatsinermut missingersuutinik pilersitsisoqassasoq.

Aalajangiineq

Innersuussutini 2 akuersissutigineqarpoq

Ilanngussat

1. Sisimiuni Akia-ni meeqqerivimmut 2021-imit ukiunullu missiliuteqarfinnut atuiffinnut ingerlatsinermut missingersuutit
2. Sisimiut illoqarfiani ukioqanngitsuniit tallimat tikillugit ukiulli amerlassusaat

Imm. 04 Atuarfinni nerisaqartitsineq

Journal nr. 17.00.01

Tunuliaqutaq

Nunatsinni Namminersorlutik Oqartussat 2012-imi atuarfeqarfinni nerisaqartitsisarneq pillugu suliniuteqartoqarnissaanik kissaateqarput. Namminersorlutik Oqartussat Kommunitut ataatsimut aningaasaliissutiniit aningaasaliissuteqaratik, kommunit Namminersorlutik Oqartussanut tapiissutissanik qinnuteqarsinnaanerannik Namminersorlutik Oqartussat periarfissiipput. Taamanili taamatut aaqqiineq atuuppoq, atuarfinnilu atuartunut nerisaqartitsineq/taquaqartitsineq Qeqqata Kommunitut atuutilersinneqarpoq, tassungalu tapiissutinik Namminersorlutik Oqartussanut qinnuteqartoqarluni.

Nerisaqartitsinermut Namminersorlutik Oqartussat tapiissuteqartarnini unitsinnikuuaa, 2020-miili januaarip aallaqqaataanit kommuni nerisaqartitsinermut tapiissutinik tigusaqartarunnaarluni. Aaqqissuussinerli kommunalbestyrelsip kissaateqareernerata kingorna taamatut ingerlatiinnarneqarpoq,

Ilinniartitaanermut ataatsimiititaliap siunissami atuarfinni nerisaqartitsinerup qanoq ingerlanissaa februaarip pingajuani 2020-mi ataatsimiinnerminni eqqartorpaat, ukuninnga innersuuteqarlutik:

1. maannakkut aningaasaliissutit atorlugit nerisaqarnermik aaqqissuusaaq attatiinnarneqassanersoq
2. nerisaqartitsineq annikillisinneqassanersoq, ass. ulluni atuarfiusuni aalajangersimasunut
3. nerisaqartitsineq nukarlernut akullernullu annertunerusumik atuutinneqassasoq
4. nerisaqartitsineq 'pissaaleqisunut' taamaallaat atuulluni ullaakkorsiornissamik neqerooruteqarnikkut
5. Sisimiuni ataatsimoorussamik atuiffimmi 571030200-0302010000-010580 122080400-mi nerisaqartitsinermut aningaasaliissutit marlunnut avinneqassasut, Nalunnguarfiup Atuarfiata kiisalu Minngortuunnguup Atuarfiata namminerisamik atuiffinut inissinneqarlutik.

Ataatsimiititaliap innersuussutit itigartissutigai "Suliaq kinguartissasoq, tassani suliamut tunngasumik susasaqartut soorlu atuarfimmi siunnersorti atuartunullu sinniisut tusarneqaqaarnissaminnik kissaateqarnerat" aalajanngerlugu.

Maleruagassatigut tunngavigisaaq

Qeqqata Kommunitut karseqarnermut naatsorsuuserinermullu malittarisassat.

Suliffeqarfiit inuussutissaleriffiusut pillugit Namminersornerullutik Oqartussat nalunaarutaat nr. 21, 27. juli 1998-imeersoq

Pissutsit atuuttut

Qeqqata Kommunitut atuarfiit tamarmik ukuninnga tusarniarneqarput:

1. nerisaqartitsineq annikillisinneqassanersoq, ass. ulluni atuarfiusuni aalajangersimasunut
2. nerisaqartitsineq nukarlernut akullernullu annertunerusumik atuutinneqassasoq
3. nerisaqartitsineq 'pissaaleqisunut' taamaallaat atuulluni ullaakkorsiornissamik neqerooruteqarnikkut
4. Taamatullu atuarfinni nerisaqartitsinerup allatut aaqqissuunneqarsinnaanera kissaatigineqarnerluni

Qeqqata Kommuniiani atuarfinit tamanit tusarniaanermut akissuteqaatit tiguneqarput. Tusarniaanermut akissuteqaatit ilanngussatut ilanngunneqartut ima isikkoqarput:

Tusarniaanermut akissuteqaatit uangaaneersut	Atuartut sinniisaat isumaqarput	Atuarfimmi siulersuisut isumaqarput
Maniitsumi Atuarfik Kilaaseeraq	Atuarfimmi nerisaqartitsineq taamatut ingerlaannarnissaa kissaatigineqarpoq	Atuarfimmi nerisaqartitsineq ingerlaannarnissaa kissaatigineqarpoq. Alloriarfinni 1-2 immikkullu atuartitsivinni taamaallaat sassaallineq misilinneqaraluarpoq, nerisassat akiaat allannortinnagu mamartuunissaat anguniarlugu Meeqqat uullaakkorsiorsimanngitsut taquanngitsullu allaffimmut ullaakkorsiorartorsinnaapput. Eqimattallu aalajangersimasut neqeroorummik atuinerat malunnarpoq. Atuartut tamangajammik naminneq taquartut saniatigut atuarfimmi nerisassat nerisarpaat. Aningaasat ikippallaarput, nerisassallu mamarunartumik sassaalliunneqarnissaat anguniarlugu qaffaneqarnissaat kissaatigineqarluni. Soorlu naatitanik, kaageeqqanik peqqinnartunik immuup sukkutaqanngitsunillu immuaqqanik sassaalliisinnaasunik sulisunik marlunik atorfinitsitsinikkut. Nutarsaanermi atuarfimmuut kantina pillugu piumasaaqaat.
Sisimiuni Nalunnguarfiup Atuarfia	Atuartut sinniissat nerisassat atuarfimmi sassaalliutigineqartartut ilarisimaarpaat, ingerlanneqaannarnissaalu kissaatigalugu. Nerisassanilli kissartunik sandwichinillu sassaalliisoqartarnerunissaa kissaatigalugu. Iffiat mamarnerusut sassaalliutigineqartarnissaat kissaatigineqarput. 2. D nerisassat atuarfimmi nerisaqartitsineq iluaraat, nerisassallu mamaralugit.	Nerisassiortut ulloq taanna atuartut qassit atuarfimmi nerissanersut allattortarpaat, nerisassanik eqqaaneq ingalassimaartinniarlugu. Atuarfimmi nerisaqartitsinerup pissakilliortunuinnaanngitsoq ingerlaannarnissaa kissaatigineqarpoq.

Imaqarniliaq Ilinniartitaanermut ataatsimiititaliap Maj-ip. 04-ani 2020-imi ileqquusumik ataatsimiinnera 04/2020

	Allanik nerisassaqaqtarnissaa tamulugassaqaqtarnissaalu aamma siunnersuutigineqarpoq.	
Sisimiuni Minngortuunnguup Atuarfia	Aaqqissuussineq iluarisimaarneqarpoq. Kisiannili nukarlernut akullernullu taamaallaat sassaalliisoqaqtarnissaa kissaatigineqarluni. Angajulliit naatitanik taamaallaat pisinnaapput. Nerisassat pissanganarnerit kissartuunerusut, iffiat pivallaarnagit kissaatigineqarput. Atartut sinniisaat nerriveeqqamik nerisassanik tamulugassamillu tuniniaaffiusinnaasumik kissaateqarput.	
Itillip Atuarfia, Itilleq	Ilaqutariippassuaqarpoq pissakilliortunik. Atuartut atuarfimmi nerisaqaqtitsineq iluaraat. Ataasiakkaat ullaakkorsiuteqaqtarnissaa kissaatigaat. Marlunngornikkut sisamannngornikkullu kissartutortarput. Akulikinnerusunik kissartunik nerisassaqaqtarnissaa ilaasa kissatigaat. Tamarmilli atuarfimmi nerisaqaqtitsinerup ingerlanneqaannarnissaa kissaatigalugu.	
Sarfanguit Atuarfiat, Sarfanguit	Atuarfimmi nerisaqaqtitsineq atorlugulu tapersensorpaat, aningaasaliissutillu qaffanneqarnissaat kissaatigalugu.	Atuarfimmi nerisaqaqtitsineq atorlugulu tapersensorpaat, aningaasaliissutillu qaffanneqarnissaat kissaatigalugu.
Kangerlussuarmi Qinguata Atuarfia	Nukarliit (1.-5. kl.) pingaarnertut ullut tamaasa atuarfimmiit nerisaqarusupput, angajulliilli	Taqaqaqtitsinerup ingerlaannarnissaa pingaaruteqartoq isumaqarlutik. Ilaqutariit ilaat pisariaqaqtitsisorujussupput, atuarfimmilu

	(6.-10. kl.) pingaarnertut massakkut atuuttoq (Ullut tamaasa naatitaq ataaseq) imlt. sapaatip akunneranut pingasoriarluni atuarfimmiit nerisassanik sassaalliisarneq ingerlatiinnarusuppaat. Tassa imaappoq, atuartut sinniisaata klassini alloriarfiit akornanni atuarfimmi nerisaqartitsinerup assigiinngitsuunissaat kissaatigaa.	nerisaqartitsineq minnerpaamik sapaatip akunneranut pingasoriarluni pisarnissaa iluarinerullugu. Angajullit atuarfimmi nerisaqartitsinermik atuerpianginnerat isumaqatigaat, kisiannili angajullerni kaattuni periarfissanissaa isumaqarput.
Kangaamiut Atuarfia, Kangaamiut	Atuartut sinniisaasa atuarfimmi siulersuisut innersuussutaat taperserpaat.	Atuarfimmi nerisaqartitsinermut atuiffik meeqqamut ataatsimut 8 koruuni suli ingerlanneqarnissaa kissaatigineqarpoq. Meeqqalli pingasunnigornikkut taquartanissaat kissaatigalu, atuiffiup ajunnginerusumik atorneqarnissaa anguniarlugu. Nerisassiorput sapaatip akunneranut nalunaaquttap akunneri qulit suli paariinnassavai, pingasunnigornikkullu nerisassiornissamut pilersaarutit, peqqinnissaq allallu misissorsinnaallugit.
Napasup Atuarfia, Napasoq	Atuartut sinniisaasa isumaat assigiinngillat. Aappaata atuartut namminneq taquartarnissaat tapersersorpaa, aappaatalu atuartut kaannginnissat anguniarlugu atuarfimmi nerisaqartitsinnerup ingerlatiinnarneqarnissaa kissaatigalugu.	Atuartut nammineq taquaminnik nassartarnissaat kissaatigaa, angajoqqaat akisussaaffianik arsaarinertut isigigamiuk. Meeqqat ilaat taquaqanngikkaangamik atuarfimiit nerisinneqartarput. Taquassanik taamaallaat nerisarnepup kingorna taquartartut ikiliartorput, atuarfimmilu nerisassaqartitsineq ingerlanneqaqqittalerluni, atuarfimmilu siulersuisut tamannattaq tapersersorpaa.
Atammiup Atuarfia, Atammik		Atuartut taquartarnerat ingerlatiinnarusuppaat. Tallimannigornikkut atuartut namminneq toqqakkaminnik nerisassiornermi nammineq kissartunik nerisassiorput. Angajoqqaat atuartuutitik taquarsimanngippata sianerfigineqartarput, atuartorlu nerisasaanik pajunneqartarluni. Angajoqqaat akissaqanngippata, atuortoq atuarfimmit nerisinneqassaaq.

Taassuma saniatigut atuarfiit tamarmik atuartut elektroniskimik akisassaannik linkimik nassinneqarnikuupput. Atuartut atuarfimmit sassaalliutigineqartut sorliit nerisarnelugit ilaatigut akissavaat, assersuutigalugu atuarfimmi naatitartortarnerlutik, aammalu kommuni atuarfimmi nerisassanik akeqanngitsunik sassaalliiginnartassanersoq, kiisalu toqqaasinnaagaluarunik nerisassat suut toqqassanerlugit. Atuartut 1300-niit 397-it akipput, tassa imaappoq 26%-it akisimallutik. Atuarfiilli marluk allakkatigut elektroniskiuunngitsumik akipput. Taakku tusarniaanermut akissuteqaatinut ilaapput, ilanngussaq 1-imili akissutitut elektroniskiusunut piareersarneqarnikuusumi ilaanatik. Pappiaqqatigut akissutit elektroniskimillu akissutit assigiipput.

Atuartut apeqqutinik akissuteqarnikut amerlanerit sassaalliutigineqartunik nerisartut, amerlanerillu atuarfimmi nerisassaqartitsinerup ingerlanermisut ingerlaannarnissaanik kissaateqartut, elektroniskimik misisusinerit takutippaat

Atuilluartuunissakkut kingunerisinnaasai

Ukiorpasuaangortuni misileraanerit kingorna meeqqat atuarfiini nerisaqartitsinerup isummerfiginissaa atuilluartuuneruvoq.

Aningaasaqarnikkut allaffissornikkullu kingunerisinaasai

Nunaqarfinni atuarfiit namminneq atuiiffimminni nerisaqartitsinermut aningaasaateqarput. Sisimiuni nerisaqartitsinermut aningaasaliissutit ataatsimoorussamik atuiiffimmut ikineqarnikuupput, nerisaqartitsinissamullu aningaasaliissutit ataatsimoorussamik atuiiffimmi inissinneqarlutik, ataatsimoorussamik atuinissamut 1.283.000,- koruuniullutik. Namminersorlutik Oqartussat aningaasaliissutaat peerlugit Sisimiuni atuarfinni 8-9. klassip missanut atuartoq ataaseq ulloq atuarfiusoq ataatsimut akissaqarfigineqarput. Maniitsumi aningaasat Atuarfik Kilaaseeqqap atuiiffianiipput, 2020-mullu missingersuutini 500.000,- koruuniullutik.

2019-imi Qeqqata Kommunia Namminersorlutik Oqartussanit 441.639,- koruuninik aningaasaliiffigineqarpoq. Ukiunilu siuliani aningaasaliiffigineqarnerit assigiinngisitaarnikuullutik, allaat ukiut ilaanni aningaasaliisoqarneq ajorluni.

Allaffeqarfiup naliliinera

Qeqqata Kommuniani atuarfinni siulersuisut atuartullu sinniisaasa amerlanerit atuarfimmi nerisassanut aningaasat paariinnarneqarnissaat kissaatigaat. Atuarfinni siulersuisut atuartullu sinniisaasa aaqqissuussap taamatut ingerlaannarnissaa kissaatigaat, naak allat atuartunut tamanut nerisaqartitsinermik periutsinik allanik misiliisut. Ilaasa nukarlerni akullernilu atuarfimmi nerisitsineq kisimi atorneqarnissaa kissaatigaat, ilaasalu angajoqqaat nammineq atuartuutitik taquassaqarnissaanik qulakkerinnissasut, taquaqanngikkaannilu atuarfimmit nerisinneqarnissaq periarffissaasasoq kissaatigalugu.

Atuarfiit siulersuisuininngaaniit aammalu atuartut sinniisaaniit tusarniaanerit, kiisalu Qeqqata Kommuniani atuarfinit tamani atuartunit tusarniaanerit eletroniskiusut takutippaat, allanguutissatut siunnersuuteqarlutik atuarfinni nerisaqartitsinerup attatiinnarneqarnissaa kissaatigineqartoq.

Atuarfinni siulersuisut atuartullu sinniisaasa tusarniaanermut akissuteqaataat allaffeqarfiup atuarfimmi nerisaqartitsinerup massakkut aningaasatigineqartut atorlugit

ingerlanneqaarnarnissaanut innersuussutaat uppernarsarpaa, taamatullu siornatigut Namminersorlutik Oqartussanit nerisasaqartitsinermit tapiissutit matussuserniarlugit, ilassutitut aningaasaliissussanik ujarlertoqassaaq. Allaffeqarfik naliliivoq, atuarfinni siulersuisut najukkami nerisartakkat assigiinngiiaarneri malillugit atuarfimmi nerisartaqartitsineq aalajangersassagaat. Angajullernut atuarfimmit nerisitsineq unitsinneqarsinnaanera, atuartunullu ilaqutariinnit pissakillioortuningaaneersunut atuarfimmit kissartunik nerisitsinnaanissaq anguniarlugu ullunik taquarfeqartitsinerit, atuarffinni siulersuisunut atuartullu sinniisaannut suliakkiutigineqarsinnaapput. Atuarfinni siulersuisut atuartut pissakillioortuningaaneersut ullaakkorsioqqaaratik taquaqaratillu aggartartut ernumagaat. Atuarfimmilu nerisartaqartitsinissamut aningaasaliinikkut atuartut taakku atuarfimmit isumassorneqarnissaat qulakkeerneqassammata.

Allaffeqarfiup atuarfimmi nerisartaqartitsinerup aningaasaliissutigineqartut atorlugit ingerlaannarnissaa innersuussutigaa.

Innersuussut

Ilinniartitaanermut ataatsimiititaliamut innersuutigineqarpoq:

1. aningaasat maanna pigineqartut atorlugit atuarfimmi nerisartaqartitsineq paariinnarneqassasoq.
2. Atuarfinni siulersuisut atuartut sinniisaat peqatigalugit aningaasat qanoq agguataarneqarnissaannut namminneq aalajangiinissaminnut periarfissinneqassasut. Angajulliit nerisassanik sassaalliivigineqartarnerisa ingerlaannarnissaat, taquarfimmik ulloqassanersoq, nerisassanik kissartunik sassaalliisarneq taquanilluunniit nassartarneq akulikillissanersut il.il. aalajangissavaat.

Aalajangiineq

Innersuussutigineqartut akuerineqarput

Ilanngussat

1. Apriilimi 2020-mi nerisqaarnermut tunngatillugu misissuinermit inernerit
2. Atuarfik Kilaaseqqap tusarniummut akissuteqaataa
3. 3 A. 3.B., 3.C.+ 3.D. Nalunnguarfiup Atuarfiata tusarniummut akissuteqaataa
4. Minngortunnguup Atuarfiani atuartut sinniisaasa tusarniummut akissuteqaataat
5. Itillip Atuarfiani atuartut tusarniummut akissuteqaataat
6. Kangaamiuni atuartut sinniisaasa atuarfimmilu siulersuisut tusarniummut akissuteqaataat
7. Napasup Atuarfiata tusarniummut akissuteqaataa
8. Qinguata Atuarfiata tusarniummut akissuteqaataa
9. Sarfannugit Atuarfiata tusarniummut akissuteqaataa

Imm. 5 2021-mut missingersuutitut ukiunullu missiliuteqarfiusunut missingersuutitut kissaatit

Journal nr 06.01.00

Tunuliaqutaq

2020-mi marsimi Aningaasaqarnermut ataatsimiititaliap ataatsimiinnermini, 2020-mut missingersuutitut ukiunullu 2021-23-mut missiliuteqarfiusunut piffissaliussatut pilersaarut akuersissutigaa. Tamatuma kinguneraa ataatsimiititaliat kingusinnerpaamik 2020-mi juunip aallaqqaataani missingersuutitigut kissaatinik tallimanik nassiussissasoq.

Maleruagassatigut tunngavigisaq

Qeqqata Kommuniiani karseqarnermut naatsorsuuserinermullu malittarisassat. 2020-mut missingersuutissanut, ukiunullu missiliuteqarfiusussanut piffissatut pilersaarut pingaarneq.

Pissutsit atuuttut

Ilinniartitaanermut ataatsimiititaliap akisussaaaffiunut tunngatillugu Suleqatigiinnissamut isumaqatigiissut tullinnguuttunik qulequtaqarpoq:

- A. Meeqqeriveqarfik
- B. Meeqqat atuarfiat
- C. Kulturi sunngiffimmilu sammisassat:
- D. Timersortarfiit silamilu timersuutit:
- E. Peqqinneq – Pinaveersaartitsineq.
- F. Ikiaroomartoq
- G. Suliffeqarneq, suliffissaqartitsineq suliffeqarfiillu
- H. Suliffissaaleqineq

Atuiffik 75-imi sanaartornissamut missingersuutini pioreersuni ukununnga aningaasat ilanngunneqareerput:

- Kangaamiuni Maniitsumilu meeqqat atuarfiinik nutarsaaneq
- Sisimiuni meeqqerivik nutaaq
- Kangaamiuni fritidshjem nutaaq
- meeqqanut inuusuttunullu silami sammisassanut aningaasaliissutit
- Maniitsumi majuartaat
- Sisimiuni kulturikkut illorsuarmut ilassutitut atuakkanik atorniartarfik nipilersornermullu ilinniarfimmu etape 2 aammalu Maniitsumi misissuinissaq
- nunaqarfinni minnerni multisalet/minihallet
- Kangerlussuarmi timersortarfik tamatigoortoq

Ilinniartitaanermut immikkoortup iluani ingerlatsinermut atuilluartuunissamilu suliniutini angajoqqaat akisussaaqataanerunissaat, nunaqarfinni atuartut akuutinneqarnissaat, ikaarsarneq, Kivitsisa, sullitat pillugit ataatsimeeqatigiittarnerit, peqatigiiffiillu akornanni nammineq kajumissuseq atorlugu suliaqarneq annertunerusumik ukkatarineqarpoq.

Atuilluartuunissakkut kingunerisinnaasai

2021-mut missingersuutitut, ukiunullu missiliuuteqarfiusunut politikikkut anguniakkat, missingersuutinullu kissaatit akornanni naapertuuttoqarpat atuilluarterussaaq.

Aningaasaqarnikkut allaffissornikkullu kingunerisinaasai

Piffissaliusaaq naapertorlugu 2020-mi aggustimi missingersuutissat pillugit isumasioqatigiinneq Maniitsumi ingerlanneqassaaq, taassumalu kingorna missingersuutissat pillugit isumasioqatigiinnermi kissaataasimasut tulleriissaarneqarsimasut kingunissaat allaffeqarfiup aggustip tungaanut misissussallugit.

Allaffeqarfiup naliliinera

Allaffeqarfiup nalilerpaa, suleqatigiinnissamik isumaqatigiissummi ataatsimiititaliap akisussaaffiitut tunngasut eqqarsaatigalugit tulluuttut eqqarsaatigineqartariaqartut:

- A. Meeqquerivinni paarlattaasartussat
- B. Tusarnaartitsisarnissanut nipilersornermut atortut
- C. Perorsaanikkut ineriartuutaasumik sunngiffimmi neqeroorutit
- D. Ilinniartut inaanni perorsaasut
- E.

Innersuussut

Aalajangiineq

Sisimiuni atuartussalerivissaaq aningaasaliiffigineqassasoq Meeqquerivik Sisi-koq.

Ilanngussat

1. Missingersuusiornissamut pingaarnertut piffissaliussat
2. Siumut, Inuit Ataqatigiit aamma Partii Naleraq akornanni suleqatigiinnissamik isumaqatigiisut

Imm. 06 Silami timersornikkut atortulersuutinik agguataarineq.

Journalnr. Xx.xx

Tunuliaqutaq

Qeqqata Kommunianni ukioq 2016-imi silami timersorfusinnaasunik meeqqanut inuusuttunullu pinnguarfusinnaasunik pilersuinissaq aalajangiunneqarpoq, aningaasallu 1 mio. koruunit ukiut tamaasa atugassatut immikkoortinneqartarlutik.

Aningaasat 2 mio. koruuninut qaffanneqassasut 2018-imi aalajangiunneqarpoq, aningaasat sunngiffimmi silami innuttaasunut meeqqaanut inuusuttunullu atorneqartarnissaat timersorfusinnaasunit imaluunniit sunngiffimmi sammineqarsinnaasunut atorneqartassasut aalajangiunneqarlutik.

Maleruagassatigut tunngavigisaq

Qeqqata Kommunian ni aalajangersakkat.

Pissutsit atuuttut

Nunarfiit aqutsisui kiisalu nunaqarfinni allaffimmiut saaffigineqartarput, nunaqarfinni suut kissaatigineqarnerisut, kissaatigineqartullu aallaavigalugit atortussanik pisisoqartarluni.

Sisimiuni 2016-imiit aningaasat agguataartarneranni annerusumik Sisimiut pilersorneqanngilaq, Sisimiunimi sammisassat amerlaneruneri aallaavigalugit nunaqarfii kiisalu Maniitsoq pilersorneqarnissaat salliutinneqarnikuupput.

Nunaqarfinni pilersuineq ingerlanneqarluarpoq kiisalu Maniitsumi majuartaammik pilersitsisoqarnikuulluni, tassungalu atatillugu ukioq 2018-imi Sisimiut annerusumik pilersornissaa kissaatiginarluni.

Ukioq 2016-imi aningaasat agguanneqarneri kiisalu sumi pilersuisimaneq imatut isikkoqarpoq:

Illoqarfik	Pisiat suuneri	Aningaasatuutissat
Napasoq	Arsarnermi málit	Kr. 20.000,-
Maniitsoq	Majuartaat	Kr. 213.400,-
Kangerlussuaq	Skate park atortut	Kr. 16.700,-
Katillugit		Kr. 397.236

Ukioq 2017-imi aningaasat agguanneqarneri kiisalu sumi pilersuisimaneq imatut isikkoqarpoq:

Illoqarfik	Pisiat suuneri	Aningaasatuutissat
Sisimiut	ATV sukuutsertarfik, Beachvolley, qallorfeeraq	Kr. 136.000,-
Maniitsoq	Majuartaat	Kr. 383.000,-
Itilleq	Silami timigissartarfik	Kr. 147.000,-
Napasoq	Silami timigissartarfik	Kr. 152.000,-
Atammik	Pinnguartarfik	Kr. 55.500,-
Katillugit		Kr. 873.500,-

Imaqarniliaq Ilinniartitaanermut ataatsimiititaliap Maj-ip. 04-ani 2020-imi ileqquusumik ataatsimiinnera 04/2020

Ukioq 2018-imi aningaasat agguanneqarneri kiisalu sumi pilersuisimaneq imatut isikkoqarpoq:

Illoqarfik	Suussusaa	Aningaasatuutissat
Sisimiut	Nalunnguarfiup eqqaani kikkunnut tamanut timersorfiusinnaasunik pilersitsineq	Kr. 1.000.000
Maniitsoq	Pinnguarterfinnik pilersitsineq	kr. 100.000
Napasog	Silami timigissartarfik	Kr. 150.000,-
Itilleq	Pinnguarterfik qallortarfik "Klatretårn"	kr. 100.000
Sarfannuguit	Pinnguarterfik qallortarfik "Klatretårn" arsaattarfiup sioralernissaa	Kr. 300.000,-
Kangerlussuaq	Nerriviit silami pinnguarterfiit nutaat arsaattarfik nutaanik 7 mandsmål.	Kr. 100.000.-
Kangaamiut	Nerriviit silami pinnguarterfiit nutaat	Kr. 100.000,-
Atammik	Assammik arsarnermi silami målit	Kr. 20.000,-
2017-imi	Pisiat suli naatsorsuutitut ikkunneqanngitsut	Kr. 90.000,-
Sillimmatit	Aningaasartuutaasinnaasut	Kr. 40.000,-

2019-imi aningaasanik agguataarainerup sumilu inissinneqarneri pillugit takussutissiaq:

Kangerlussuaq	75-06-30-50-61	Arsaattarfioreersoq ivigaasanik qallerneru	600.000.-
Sarfannuguit	75-06-40-50-61	Platform terrasse arsaaffiup eqqaanut	100.000.-
Itilleq	75-06-50-50-61	Meeraaqqanut issakatsiaarfik	18.000.-
-	75-06-50-50-61	Meeqqanut kaavittarfik tigummiartarfik	43.000.-
-	75-06-50-50-61	Robiniagyngemeeqqanut	24.000.-
Maniitsoq	75-06-20-50-61	Pumptrack sukkilertarfik	225.000.-
-	75-06-20-50-61	Pinnguarterfiit:	250.000.-
Kangaamiut	75-06-60-50-61	Arsaattarfimmi isiginnaarfik toqqorsivillu	180.000.-
-	75-06-60-50-61	Ullorissanut qinngut	10.000.-
Atammik	75-06-80-50-61	Pinnguarterfiit:	150.000,-
-	75-06-80-50-61	Nerriviit issiavittallit qulit	20.000.-
Napasog	75-06-70-50-61	Nerriviit issiavittallit qulit	20.000.-
Aningaasartuutissat katinneri			2.000.000,-

Ukioq 2019-imi pisiat naatsorsuutitut suli ikkunneqanngitsunut aningaasartuutissat ukuupput:

Kangerlussuarmi arsaattarfik ivigaasanik qallikkamik pilersitsineq kr. 600.000,-

Atuilluartaunissakkut kingunerisinnaasai

Sunngiffimmi silami sammisassanik pilersuinissaq kiisalu inerisaajuarnissaq atuilluartauneruvoq. Qeqqata Kommunianni sunngiffimmi timersorfiusinnaasunik innuttaasut peqqinnartunik sammisassaqtuarnissaat atuilluartauneruvoq.

Imaqarniliaq Ilinniartitaanermut ataatsimiititaliap Maj-ip. 04-ani 2020-imi ileqquusumik ataatsimiinnera 04/2020

Aningaasaqarnikkut allaffissornikkullu kingunerisinaasai

Aningaasat 2 mio. koruunit immikkoortinneqareermata aningaasaqarnikkut kinguneqassanngilaq

Aningaasat agguataarnissaat ukioq 2020-mi kissaatigineqartut aallaavigalugit imatut isikkoqarput:

Illoqarfik	Suussusaa	Aningaasatuutissat
Sisimiut	Taseraliup eqqaani silami timigissartarnermut atortunik iluarsartuussineq	Kr. 150.000,-
-	Ujakkaartartut illingernini qullersuit	Kr. 450.000,-
-	Illup iluani assammik/isikkamik arsaannermi málit mikisut	Kr. 24.000,-
-	Spinning sikkilit	Kr. 40.000,-
Maniitsoq	2019-imi pisiaasimasunik Pumptrack-imik pinnguarterfimmillu pilersitsineq	Kr. 150.000,-
Kangerlussuaq	Arsaattarfik ivigaasanik qallikkap pisiarineranut akiligassap sinneranik akiliineq	Kr. 876.000,-
Atammik	2019-imi pisiaareersimasumik pinnguarterfimmik pilersitsineq	Kr. 150.000,-
Kommunini tamani	Timersoqatigiiffiit atortusinissamut qinnuteqarfisinnaasaat	Kr. 160.000,-
Katillugit		Kr. 2.000.000,-

Aningaasat agguataarnissaat kissaatigineqartut malillugit taamatut isikkoqarput.

Allaffeqarfiup naliliinera

Allaffeqarfiup nalilerpaa ukioq 2020-mi pilersinneqartussat kissaatigineqartut siunnersuutit akuersissutigineqarnissaa.

Akuersissutigineqarpat piaartumik pisiassat piniarsissaat suliarineqassaaq, aasamut tamarmik pilersinnissaat anguniarlugit.

Innersuussut:

Ilinniartitaanermut ataatsimiititaliami akuereqqullugu innersuussutigineqarpoq

Siunnersuut 2020 eqitsit akuersissutigineqassasoq.

Aalajangiineq:

Innersuussutigineqartoq akuersissutigineqarpoq.

Qeqqata Kommuniani ajakkaartartunut tamanut tunngatinneqassapput.

Ilanngussat

Suliassat nalinginnaasut

Imm. 07 Ilinniartitaanermut ataatsimiititaliap 2020-mi maajimiit decembarimut ataatsimiittarnissanut ullussatut nutaatut siunnersuut.

Tunuliaqutaq

Kingullermik ataatsimiinnerup kingorna, Atugarissaarnermut ataatsimiititaliap ullut ataatsimiiffissat akuersissutiginiuuai, taamaalilluni Atugarissaarnermut ataatsimiititaliap allannguineranut sianiginnittumik ullunut ataatsimiiffissanut nutaanut siunnersuut nassiunneqarpoq.

2020-mi maajimiit decembarimut ataatsimiititaliap ullut ataatsimiiffissatut allatseqarfiup siunnersuutaa.

Ataatsimiinneq nr. 07 2020-mi septembarip pingajuanut allanngortinneqarnissaa siunnersuutigineqarpoq, aamma nr. 10 2020-mi decembarip pingajuanut allanngortinneqassasoq siunnersuutigineqarpoq.

Ullut ataatsimiiffissanut nutaanut siunnersuut tullinnguuttutut isikkoqarpoq:

Ilinniartitaanermut ataatsimiititaliap	Aningaasaqarnermut ataatsimiititaliap	Kommunalbestyrelsi
nN. 4 04. maj	21. april	30. april
Nr. 5 02. juni	19. maj	28. maj
Nr. 6 03. august	16. juni	
Nr. 7 03 september	18. august	27. august
Nr. 8 05. oktober	15. september	24. september
Nr. 9 02. november	20. oktober	29. oktober
Nr. 10 03. december	17. november	26. november
	15. december	

Innersuussut

Ullut ataatsimiiffissatut siunnersuutaasut Ilinniartitaanermut ataatsimiititaliami akuersissutigineqassasut innersuussutigineqarpoq.

Aalajangiineq

08. Juni. 09. November Ullut ataatsimiiffissat allannguiffigineqartut.

Ilanngussat

1. 2020-mi ataatsimiititaliat ataatsimiinnissanut pilersaarut nutaaq

Imm. 08 Illoqarfinni atuarfinni aamma Kangaamiuni Kangerlussuarmilu atuarfinni nakkutillineq

Journal nr. 51.00

Tunuliaqutaq

Ataatsimiititaliap illoqarfinni atuarfinnut ukiumut nakkutilliisarnissaanik alakkarterisarnissaanillu ilaatigut kinguneqartussamik, meeqqat atuarfiinut tunngatillugu nakkutilliinissami, attaveqarnissamilu pilersaarut kommunalbestyrelsip 2015-imi aggustip 28-ani ataatsimiinnermini akuersissutigaa.

Ilinniartitaanermut Immikkoortortami aqutsisut novembarimi, decembarimi aprilimilu illoqarfinni atuarfinni nakkutilliinikuupput.

Maleruagassatigut tunngavigisaq

Atuarfik pillugu Inatsisartut inatsisaat nr. 15, 3. December 2012-imeersoq.

§ 43--mi allassimavoq, "Kommunalbestyrelse atuarfiit sulinerannik nakkutilliisuvoq, tassaasorlu atuarfiup Inatsisartut inatsisaanni matumani aalajangersakkanik eqqortitsinersut".

Pissutsit atuuttut

Meeqqat atuarfiini nakkutilliinissami, attaveqarnissamilu pilersaarutip ilaatigut kingunerivaa, kommunalbestyrelsip meeqqat atuarfiinik siunissami nakkutilliinissaani,

1. atuarfiit tamarmik ukiumut nakkutilliilluni alakkarterneqartassasut
2. illoqarfinni ilinniartitaanermut pisortaq nakkutilliinissami akisussaassasoq
 - a. illoqarfinni atuarfinnik nakkutilliinermi, ilinniartitaanermut pisortaaneq pisariaqartitsineq naapertorlugu peqataasassasoq
 - b. illoqarfinni atuarfinnik nakkutilliinermi, atuarfiup aqutsisui pisariaqartitsineq naapertorlugu peqataasassasut
3. pitsaassutsimik nalunaarussiaq, nakkutilliinissamilu malitassaq nakkutilliilluni alakkarterinermi aallaavigineqartassasut
4. siuliani pilersaarut, friskolini nammineq nakkutilliisoqarfiunngitsuni aamma atuutissasoq

Meeqqat atuarfii pillugit attaveqatigiinneq, kommunalbestyrelsip tulliuuttut iliuuseqarnermigut eqqummaariffigissagaa

- A. IKSA-p
 - a. illoqarfinni atuarfiit ukiumut alakkartertassagai
 - b. Kangerlussuaq Kangaamiullu ukioq allortarlugu tikeraartassagai
 - c. nunaqarfinni atuarfiit sinneri ukiut sisamakkaarlugit tikeraartassagai
- B. IKSA-p
 - a. illoqarfinni atuarfinni, nunaqarfinnilu atuarfinni annerni marluusuni siulersuisut ukiumoortumik ataatsimiinnissamut aggersartassagai
 - b. atuarfiillu sinneri ukioq allortarlugu ataaatsimiinnissamut aggersartassagai
 - c. ukiumut nalunaarussiaq, pitsaassutsimik nalunaarussiaq kiisalu nakkutilliinermi alakkarterineq aalajangersimasumik oqaluserisassaniittassapput
- C. atualeqqaarfinni, atualeqqaarfiullu kinguninngua angajoqqaanik ataatsimiisitsinerni, illoqarfinni kommunalbestyrelsimut ilaasortat, nunaqarfinnilu aqutsisuni ilaasortat peqataasarnissaannik kajumissarneqartassasut

Sisimiuni ilinniartitaanermut pisortaq/kingorna ilinniartitaanermut pisortaaneq aamma atuilluartaunissamut siunnersorti/kingorna ilinniartitaanermut pisortaagallartoq Sisimiuni januaarimi apriilimilu 2020 illoqarfimmi atuarfinni nakkutilliipput, Sisimiuni ilinniartitaanermut pisortaq Minngortuunnguup atuarfianilu pisortaq januaarip 21-ani 22-anilu Kangerlussuarmi atuarfimmi nakkutilliipput. Ilinniartitaanermut pisortaaneq Maniitsumilu ilinniartitaanermut pisortaq 2019-imi decembarip aqqaneq-aappaani Maniitsumi Kilaaseqqami nakkutillipput, ilinniartitaanermullu pisortaq Kangaamiuni atuarfimmi nakkutilliivoq.

Suliniarfiit nutaat, pilersaarusiornermilu peruiusissiaq ataatsimiititaliamit 2018-imi akuersissutigineqartoq, 2017-imi kommunalbestyrelsimit toqqarneqarnerata kingunerisaanik, nakkutilliinerni ataqeqatigiinnissaq ukkatarineqalerpoq. Tamatuma kingunerisaanik sulinnitsoortarnerit, malinnaanerit, utertitsisarnerit kiisalu atuarfiup-angerlarsimaffiup akornanni suleqatigiinneq immikkut sammineqalerput.

Nakkutilliinermi siullermi paasinarsivoq, illoqarfimmi atuarfinni pingasuusuni atuartunut atuannitsoornermut malittarisassat tulluanngitsunik imaqartut, ingammik atuartoq ulluni pingasuni atuannigissimagaangat angajoqqaat aatsaat attavigineqartartut ullormi tassani ullaap tungaani pinnani. Atuannitsoortarnermik suliaqarneq piffissap ingerlanerani suliarineqarpoq aammalu 2020-mi februaarip pingajuani ilinniartitaanermut ataatsimiititaliap ataatsimiinnermini atuannitsoortarnermut malittarisassat nutaat akuersissutigivai. Taamaattumik nakkutilliinerni atuannitsoortarnermut malittarisassat tamannalu pillugu angajoqqaanik atuarfiup suliarinnittarnera attaveqartaneralu ukkatarineqarput. Atuarfiit ilaasa skoleintra aqqutigalugu angajoqqaanut sms-ikkut nalunaartarneq atulernikuuvaat.

Nakkutilliinerni aamma takutippaat, naliliisarnermik utertiffigineqartarnermullu kulturimik suli suliaqartoqartoq. 2018-imi Kilaaseqqami aammalu Sisimiuni illoqarfimmi atuarfinni 2019-imi Ilinniartitaanermut aqutsisoqarfimmit aallartinneqarnikuusumik ingerlatsinermik atuarfinni atuarfiit ingerlataqarnikuupput, model kingulleq 2020-mi aggustimi ingerlanneqarpoq. Atuartut nalilersuiffigineqartarnerinut tunngatillugu atuartut suliatigut namminnerlu ineriartorneranni ukkataqarnissamut pikkorissaanerit iluaqutaanikuupput. 2019-ip ukiuata affaani atuarfinni aqutsisut nakkutiginninnermut ataatsimoorussamik malitassamik suliaqarnikuupput, atuarfinni aqutsisusut sulisuminnik ineriartortitsilluni oqaloqatiginnittarnerminnut aallaavittut atorsinnaasaat. Atuarfinni aqutsisunut aqutsisutut ineriartortitsinerup ilaatut aqutsisut aamma pitsaasumik utertitsisoqarsinnaanera ukkatarinikuuat. Taamaaliornikkut nalilersuinnermi annertunerusumik ukkataqarneq ingerlanneqarnikuuvoq.

Atuarfiup- angerlarsimaffiullu suleqatigiinnerat annertuumik sulissutigineqarnikkuuvoq. Angajoqqaanut ataatsimiititsisarnermut iliutsinik nutaanik misileraasoqaannaavippoq, taamaalilluni sulianut tunngasuinnarnik ataatsimiittoqarnani, angajoqqaat aamma atuarfimmi aliikkusersorsinnaaniassammata. Atuarfiup angerlarsimaffiullu suleqatigiinnerannut iliuusissatut pilersaarummik atuarfinni siunnersortit suliaqarnissaat suliarineqarpoq, angajoqqaallu amerlanerusut ataatsimiinnernut takkuttarnissaannut akuunerunissaannullu qanoq aaqqissuussisoqarsinnaaneranik isumassarsianut katalogimik suliaqartoqarluni. Taakku saniatigut atuartut suliamikkut ineriartornerat pillugu atuarfiup angerlarsimaffiullu suleqatigiinnerannut pikkorissaanerit malittsigisaannik, atuartunik nalilersuisarnermut uppersaatitsisarnermillu allaanerusumik suliaqarneq nukittunerulersitsissasoq naatsorsuutigineqarpoq.

Atuilluartaunissakkut kingunerisinnaasai

Kommunip pingaartitai naapertorlugit nakkutilliinermi isornartorsuinnaranilu illuatungerisaaq kisimi attaveqartarani, oqaloqatigiinnissaaq ineriartortitsinissarlu aamma ukkatarineqartariaqaraluarput.

Aningaasaqarnikkut allaffissornikkullu kingunerisinaasai

Nakkutilliinissami, attaveqarnissamilu pilersaarut aningaasaqarnikkut annertuumik kingunissaqanngilaq. Allaffeqarfiup illoqarfinni atuarfiit, nunaqarfiit, nunaqarfinnilu atuarfiit akulikitsumik alakkartertarpai, soorluttaaq kommunalbestyrelsi qinigaaffimmi illoqarfiit ukiut tamaasa, nunaqarfiillu ukioq allorlugu tikeraartarai. Tassunga atatillugu atuarfinni sulisut, atuarfinnilu siulersuisut ataatsimeeqatigisarnissaat eqqarsaatigineqaannassaaq. Tamatuma saniatigut ataatsimiinnerpaaluit videokonference/skype/oqarasuaatikkullu ataatsimiinnertut aaqqissuunneqarsinnaakutsoorput. Taamaakkaluartoq nakkutilliinerni pissutsit uparuarneqartut ilaat, uparuaanerup malitsigisaanik pissutsit iluarsisariaqartillugit allaffissornikkut aningaasaqarnikkullu kinguneqarsinnaapput.

Allaffeqarfiup naliliinera

Allaffeqarfiup nalilerpaa, nakkutilliinissami attaveqarnissamilu pilersaarut, atuarfinnilu aqutsisunik ineriartortitsineq meeqqat atuarfianik pitsannguutissanik kinguneqassasoq. Kisianni aamma atuarfinni ataasiakkaani unammillernarsinnaasut iluarsiivigineqarnissaat siunertaralugu politikerit malitseqartitsillutik atuarfinni siulersuisunik ataatsimeeqateqartarnissaat, atuarfinnilu soqutigisaqatigiit ataatsimoortumik oqaloqatigiinnerisigut atuarfiup unammillernartitaasa qaangerniarneqarnissaanni kikkut tamat tapertaanissaasa qulakkeerneqarnissaa pingaaruteqarpoq.

Innersuussut

Ilinniartitaanermut ataatsimiititaliamut innersuussutigineqarpoq nakkutilliinerit tusaatissatut tiguneqassasut

Aalajangiineq

Tusaatissatut tiguneqarpoq

Ilanngussat

1. Kommunalbestyrelsip 2015-imi aggustip 28-ani ataatsimiinnerani imm. 15-mut imaqarniliaq
2. Nakkutilliinissami malitassaaq
3. 2020-mi jauaarip 20-ani Minngortuunnguup Atuarfiani nakkutilliineq
4. 2020-mi apriilip 22-ani Nalunnguarfiup Atuarfiani nakkutilliineq
5. 2019-imi decembarip aqqaneq-aappaani Kilaaseeqqami nakkutilliineq
6. 2020-mi januaarip 21-ani 22-anilu Qinnguata Atuarfiani nakkutilliineq
7. 2020-mi februaarip 14-ani Kangaamiut Atuarfiani nakkutilliineq

Imm. 09 Meeqqat atuarfiini atuartut atuanngitsoortartut pillugit nassuiaat

Journal nr. 51.00

Tunuliaqutaq

2019-imi novembarip 28-ani Kommunalbestyrelsip ataatsimiinnerani atuarfiit pitsaassutsimut nalunaarusaannik suliaqarnermi, siusinnerusumut naapertorlugu angusat soq ajorseriaateqarsimanersut kiisalu atuanngitsoortarnerit soq 5 procentimik qaffariaateqarsimanersut pillugit Ilinniartitaanermut ataatsimiititaliaq nassuiaassuteqarnissaanik, Kommunalbestyrelsi piumasaaqateqarpoq. Tamatuma saniatigut unammillernarsinnaasut aaqqiivigineqarnissaanut suliniutit suut ingerlanneqarsimanersut pillugit, ataatsimiititaliaq nassuiaaqquneqarportaaq. Suliami matumani atuartut atuanngitsoortarnerannut nassuiaassisoqassaaq. Atuartut atuanngitsoortarnerisa appartinnissaanut tunngatillugu qanoq ilortarsimanerinit, illoqarfinni atuarfinni aammalu nunaqarfinni anginerusunit marlunnit nassuiaatinik allaffeqarfik pissarsinikuuvoq.

Maleruagassatigut tunngavigisaaq

Atuarfik pillugu Inatsisartut inatsisaat nr. 15, 3. December 2012-imeersoq

Pissutsit atuuttut

Meeqqat atuarfiinut pitsaassutsimut nalunaarummi ataatsimoorussami takuneqarsinnaanikuuvoq, nunaqarfinni atuarfinnut klassikkaartumik holdekkartumillu agguataagaasumi atuartut atuanngitsoortarneranni procentinngorlugu takussutissiaq. Nutaatut naqissuserneqarpoq, atuarfinnut aamma klassint ataasiakkaanut atuartutsaatitaanermut piffissamut tamakkiisumiit 5 procent qulaallugu atuartut atuarsimangikkaangata nalunaaqutsertarnissaat, tamannalu ukiup atuarfusup tamakkiisumi ullut qulini atuanngitsoortarneruvoq. Taamaalilluni atuanngitsoortarnerup qanoq qaffatsigisimaneranik oqariartuutaanngilaq, kisianni atuarfiit atuanngitsoortarneq nalilersorsinnaaneranut imminnullu sanillersuussinnaaneranut periusaasiulluni. Atuarfiit atuartut peqanngittarneri qaffasissut ersarissumik iliuuseqartussaani kuupput, klasseqatigiiaani holdinilu ataasiakkaani peqanngittarnerit appartinniarlugit paasissutissiisutit aqutigalugit aammalu atuartunik angajoqqaanillu suleqateqarnikkut. Unioqutitsilluni peqanngittarneq atuartunut ilinniartitsisunullu pinaveersaartinneqassaaq.

2020-mi februaarip pingajuani ilinniartitaanermut ataatsimiititaliap ataatsimiinnerani aalajangiunneqarpoq

Atuanngitsoornermut patsisaasoq pillugu angajoqqaat/atuartoq nalunaaruteqanngippat, atuartup atuanngitsoornerani ulloq taanna Qeqqata Kommuniani atuarfiit angajoqqaanut nalunaarutigineqartassasut.

Atuartut atuanngitsoortarnerisa annikillisarneqarnissaanut atuartut qanoq iliorsimanerinit nassuiaat pillugu atuarfiit qinnuigineqarnikuupput.

Mingortuunnguup Atuarfia atuartut atuanngitsoortarnerinit iliuusissatut pilersaarummik nutarterinikuuput Suleqatigiinnissamut ataatsimiititaliami akuerisaasumik aammalu atorneqalereersumik. Uani atuanngitsoornernut suussutsinut tamanut angajoqqaanut SMS

aqqutigalug attaveqarneq ukkatarineqarpoq, taamaalillutik ajornartorsiutit pisariaqanngitsumik annertusinnginniassammata aammalu angajoqqaanik oqaloqatigininneq piniarlugu.

Nalunnguarfiup Atuarfia:

Ukioq kingulleq nakkutiginninni malitsititut atuannitsoortarnermut iliuusissatut pilersarusiortoqarnikuuvoq. Iliuusissatut pilersaarut nalimmassarneqarpoq 2020-milu maajip aallartinnerani Suleqatigiinnissami ataatsimiititaliami akuersissutigineqassasoq naatsorsuutigineqarpoq. Ullormi atuarfiusumi atuarnerup aallartinnerani angerlarsimaffiup atuarfiullu akornanni ersarinnersumik attaveqarnissamut pisariaqartitsineq pillugu 2019-imi novembarimi KB aalajangiineranut sanilliullugu allannguisoqarpoq.

Atuarfik Kilaaseqqap attavilunneq pissutigalugu qaammatini arlalinni atuartunik ingerlatsinermut program TEA atorsinnaasimangilaa. Tamatuma saniatigut atuarfiup pisortaata nassuiaatigaa, atuartut ataasiakkaat annertuumik atuannitsoortarsimasut taamaalillunilu klassini alloriarfinni ataasiakkaani atuannitsoornermik qaffaasissumik tunisisarluni. Atuartunut taakkununga atuarfik iliuusissatut pilersarusiornikuuvoq aammalu atuartut taakku ataasiakkaat pillugit atugarissaanermut immikkoortortamik suleqateqarpoq. TEA maanna attaveqalernikuuvoq taamaattumillu ilinniartitsisut siunissami atuannitsoortunik nalunaarsuinissamut programmi atorsinnaavaat. Tamanna isumaqarpoq, atuarfiup siunissami ullormi siullermi atuannitsoortoqartillugu angajoqqaanik kalerriisinnaassaaq.

Kangaamiut Atuarfia

Atuannitsoortartunik ajornartorsiuteqanngilaq. Pisuni atuannitsoorfiusuni amerlarnertigut atuartut ilaquuttaminnik tuttunniartunut peqataanerannik peqquteqarnerusarpoq. Siusinnerusukkut atuarfik kommunimi atuarfiit sinneiniit kingusinnerusumik aallartitarnikuuvoq aammalu atuarnerup aallartinnginnerani piniartarnissaannik angajoqqaat qinnuigineqarnikuupput.

Qinguata Atuarfia:

Atuannitsoortarnermik annertunerusumik ajornartorsiuteqanngilaq. Atuannitsoortarnermut malittarisassat atuarfiup iluarsiissuteqarfiginikuuvai aammlau angajoqqaat qanimut suleqatigalugit atuartunut atuannitsoorpallaartunut iliuusissatut pilersaarutit atulernikuullugit. Kommuni atuannitsoornermut malittarisassaanut tulluartaunngortillugit, atuarfiup malittarisassat iluarsartuullugit aallartippoq.

Atuilluartaunissakkut kingunerisinnaasai

Atuarfiup naleqartitaanut maleruagassaanullu piumasaqaatit naatsorsuutigisallu kinguneqarneri, atuartup inuiaqatigiinni aammalu inuuneq naallugu naapitassanut atuilluartaunerussaaq. Tamanna aamma atuannitsoortarnermut maleruagassanut atuuppoq. Takkuffissanut isumaqatigiissutaareersunut takkutinnnginnermi, imminut soqutigisaqatigiinneq imminullu attaveqatigiinneq atuilluartaunerussaaq.

Aningaasaqarnikkut allaffissornikkullu kingunerisinaasai

Suliniuteqarfiit aningaasaqarnikkut kinguneqarnissaat pisariaqavinnngilaq, suliniuteqarfilli ilaat suliniutit naammassineqarnissaanut siusinnerusukkut immikkut aningaasaliiffigineqarnikuullutik.

Allaffeqarfiup naliliinera

Angajoqqaanut attaveqarneq aqqutigalugu atuartut atuanngitsoortarnerata apparinnissaani atuarfiit suliinnarnissaat pingaaruteqarpoq, taanna atuarnermik pissarsiaqarfiusumik nukittorsaataassammat aammlau atuartut atuanngitsoortarnera pillugu paaasissutissanik katersinermut allaffeqarfik assigiissaartumik periutsimik ineriartortitsissammat, kisitsisit assigiinngiaartut pinngitsoorniarlugit.

Innersuussut

Ilinniartitaanermut ataatsimiititaliamut allaffeqarfiup innersuussutigivaa, nalunaarusiaq akuersissutigineqassasoq kommunalbestyrelsimilu paasissutissiissutissanngorlugu ingerlateqqinneqassasoq

Aalajangiineq

Innersuussut akuersissutigineqarpoq

Ilanngussat

Paasissutissiissutit

Imm. 10 SUKORSEQ aaqqissugaanik klubbini aqutsisut sunngiffinnilu pisortat 12. & 13 februar 2020 Isumattorsaqatigiinnermi peqataanermit ilisimatitsissut.

Journal nr. 55.03.01

Tunuliaqutaq

Sukisaarsartarfiit kattuffiata SUKORSEQ isumattorsaqatigiissitsilluni (workshop) aaqqissuivoq ulluni 12. aamma 13. februar 2020 Nuummi, sukisaarsartarfinni aqutsisut kiisalu kommunit sunngfiini pisortat ataatsi-moorlutik sukisaarsartarfiit siunertaat kiisalu aaqqissugaanerit oqallinissaat siunertaralugu.

Isumattorsaqatigiinnermi siunertarineqarpoq Klubbini sulisut atugaat kiisalu sulisutigut qanoq inissisima-neq eqqartorneqassasut kiisalu qanoq suleriuseqarnerit, taamani meeqqat inuusuttullu ataatsimoortumik kattuffeqarnissaat anguniarneqarmat, nunatsinnilu meeqqat inuusuttullu pisariaqartitaanik aallussisinnaaso-qarniassammat.

Sukorseq tassaavoq, Kalaallit Nunaanni siullerpaalluni meeqqat inuusuttullu kattuffiat, suliniutigineqarlutillu meeqqat inuusuttullu atugarisamikkut pitsanngorsaaffigineqarnissaat. Aaqqissuusaaq Isumattorsaqatigiinneq Namminersorlutik Oqartussat Tipsimik lottomillu aningaasa-liissutaanit taperneqarluni akilerneqarpoq.

Maleruagassatigut tunngavissat

Inatsisartut inatsisaat nr. 5,- 6. juni 2016-imeersoq kultureqarneq sunngiffeqarnerlu pillugit.

Pissutsit atuuttut

Sunngiffimmi ornittakkat nunatsinni assigiinngitsunik periuseqarlutik meeqqanik inuusuttunillu sullissippat. Siunertamikkut assigiissuteqaraluarlutik sulisoqarnikkut nunatsinni assigiinngisaat sullissinerit meeqqani inuusuttunilu. Isumattorsaqatigiit amerlanerpaat amigaatigaat klubbini sulisunik pikkorissartitsinerit pisanninneri. Sunngiffinni ornittakkat ataatsimoorussamik siunertamik peqanngillat, pikkorissarnerillu ataatsimoorfiusut pisariaqartut amigaatigineqarlutik. Klubbini nunatsinni assigiinngitsuni malittarisassat ataatsimoorussat ujartorneqarput, assersuutigalugu snusit allani eqquteqqusaanersut apeqqutigineqarpoq. Aamma Inatsimmik ujartuisoqarpoq Klubbini sulisut qanoq amerlassuseqartarnissaanik tunngasut (normering), tassa sulisut qassit inuusuttunut qassinut amerlatiginissaa-nik sinaakutissat, tamakkuuppullu Naalakkersuisumut anngunneqartariaqartutut isumaqarfigineqarlutik assigiimmik sinaakkusersorneqarnissaanik anguniagaqartoqarnissaa. Tamakku tunngavigalugit Klubbit sineriak tamakkerlugu naliliiffigineqarnissaat kissaatigineqarpoq. Sulinermi assigiinngissutitut taaneqarpoq meeqqat/inuusuttut atuarfinni støtteqartartut klubbimut iseraangata støtteeuttarneri sulisunut atuisunullu annertuumik ajornartorsiutinngortartoq, allanilu tamanna aaqqiivigineqartarluni ajunngitsumik. Piffinni assi-giinngitsuni killilersuinerit assigiinngitsorujussuusarput soorlu atuisoq sakkortuuliortut siornatigut anisinne-qartaraluit, isersimatiinnarlugit pinnguaatinik atueqqusaajunnaarsinneqartarput, allami meeraq ajornartorsiu-teqartoq iseqqusaaneq ajorpoq nalullugu suna ajornartorsiutigineriaa. Klubbit ilaanni pinnguaatinik aserorteri-soqartarnera annertuujuvoq, allanilu atortoqartillugu depositum-ilersillugit atuisoqartarluni. Tamakku eqqar-

saatigalugit sulisugissaaneq pisariaqartinneqarpoq soorlu pikkorissaanerit aqqutigalugit, taamaakkaluartorli ukiorpassuarni sulisuusimagaluarlutik pikkorissanerit ikittuinnaat iluatsittarsimavaat.

Kommunimiit kommunimut, illoqarfinniit nunaqarfinniillu suleriaatsit pissutsillu assigiinngitsut atuuttut eqqarsaatigalugit, Naalakkersuisumik naapeqateqarnissamik SUKORSEQ-mi siulersuisut isumaqatigiissu-teqarsimapput, naapinnissamilu atukkat assigiinneqisut ataatsimoorussamik apuussinissaq ajornartorsiutit makkuninnga aallaaveqartinneqarput:

- Sukisaarsartarfiit amerlanerpaat pitsaassusaat ullutsinnut tulluukkunnaarsimallutillu naleqqukkun-naarsimasut, inatsisitigut illersugaanngillat. Ulluinnarni akisussaasuusut nutaamik illorsuartaarnissamik kissaateqarlutillu illorsuillu pitsaassusaanik misissuiffigineqarnissaat pillugit sulissuteqartaraluartut, kommunini politikerit pingaarnersiuiernerminni suliniutit kissaatigisallu ingerlanneqarneq ajorput aningaasaliiffigineqarneq ajoramik. Kommunilli tamarmik ingerlatsiveqar-fimmi ataaniittut akisussaaffigigaluaaraat, soorlu pinngitsoorani sukisaarsartarfinnik peqartussaataa-nermik nuna tamakkerlugu atuuttumik, inatsiseqanngilaq kommunit pisussaataaaffittut naammassi-niagassaanik. Tamakku pillugit Sukisaarsartarfiit ataatsimoorussamik naalakkersuisunut saaffigin-nissutigaat:
1. Sinerissami sukisaarsartarfiit illutaasa pitsaassusaanik misissueqgissaarnissaq
 2. Sullivinnik nakkutilliisoqarfimmit misissuiffigineqarnissaq
 3. Inatsisartut inatsisaat nr.5, 6. juni 2016-imeersup sukumiinerusumik eqqartuiffigineqarnissaa suki-saarsartarfeqarnerup sukumiinerusumik inatsiseqartinneqarnissaa pillugu. Anguniakkat, tunaartat, iliuusissanik pilersitsinerit, sinaakkutissat il.il. kommuninit tamanit atuuttussanngortitassat siunertaralugu.
 4. Inatsisitigut init angissusaat aallaavigalugit atuisut qanoq amerlatigisut isersimasinnaaneri paasisu-tissat kiisalu atuisut qassit sulisumit ataatsimit sullissisinnaaneranik killissarititat.

Oqaloqatigiinnermi Naalakkersuisumiit kajumissaarutigineqarpoq Sukorseq EPI-mut klubbini kulturikkut atugassarititaat pillugit attaveqassasoq, taamatuttaaq Arbejdstilsynimut attaveqassasut illuutit killiffii pillugit. Naalakkersuisuttaaq Timersoqatigiiffiit Kattuffiat ataatsimeeqatigileruniuk Timimik Nunarsuarmi Aalatitsi-nerpaanissaanik siunertaqarnermik iliuusissanik iliuuseqarsinnaanermik Sukorseq attaveqatigiileqqullugit kaammattorniartarlugit kiisalu Naalakkersuisup kommuninik naapitaqarnissamini qulaani pineqartut pillugit eqqaasaqarumalluni neriorsuuteqarpoq.

Isumattorsaqatigiinnermi sammineqartut aamma ilagaat SIK, NPK (Nunatsinni Perorsaasut Kattuffiat) aamma AK-miit saqqummiisoqarluni. NPK-meersumit klubbini normering pillugit paasisaqarusuinerat pappialanngorlugit pisinnaagunigit malersorneqarnissaanik suleqataarusupput. SIK-miit oqariartuutigineqarpoq suliffik nuannaralugu sulineq ingerlanneqartariaqartoq nuannarinagu suliso-qarsinnaanngimmat. SIK-mit aamma klubbini sulisut 2022-mi isumaqatiginninniutigisinnaaneri soqutigintippaat. Soorlu normering aqqittariaqarneri, støttepersonit amigaataasarneri il.il. amigaatit suliniutigisinnaasat pillugit. Aamma sulisut sinniisaat SIK-mi allanilu takussaanngippallaarneri uparuarne-qarpoq. Apeqqutaalerporlu SUKORSEQ isumaqatiginninniarsinnaaneraa tamakku pillugit. Isumaginninner-mut aningaasaateqarfik ilaqtutanut peruluttunik ingiaqataasinnaanermut qinnuteqarfissaq periarfissaasoq takutinneqarpoq.

SISA-miit pensionsordning pillugu aamma saqqummiisoqarpoq. Aningaasarsiat qanoq iluarsiiqqineqarnis-saat, klubbini sulinermi atugassarititat allallu ajornartorsiutit aaqqiiffiginissaat siunnersuutillu taakkartorne-qarlutik.

Atuilluartuunissakkut kingunerisinnaasai

SUKORSEQ isumattorsaqatigiissitsinerani angorusutat Qeqqata kommune-ani klubbini sulisut ataatsimut siunertamik peqalernissaat pisariaqarpoq, meeqqanik inuusuttunillu sullissinermi ineriartortitsinissaq siunertaralugu. Pikkorissaanerit sulisunik pisariaqartinneqartut ingerlanneqartariaqarput pitsaasumik ineriartortitsinissaq siunertarinnearmat meeqqani inuusuttunilu. Sisimiuni, Maniitsumi nunaqarfittaani assigiimmik pilersaarusiornikkut pikkorissaanerit ingerlanneqarpata suleqatigiinnissaq qanimut pisinnaalissaaq apeqqutaanani illoqarfimmiikkaanni nunaqarfimmiikkaaniluunniit.

Aningaasaqarnikkut allaffissornikkullu kingunerisinnaasai

SUKORSEQ aaqqissuilluni isumattorsaqatigiissitsinerat annertunerusumik aningaasaqarnikkut allaffissornikkullu kinguneqanngilaq, peqataatitat ullormusiaqarnerat eqqaassanngikkaanni. Taamaattoq siunissami iliuusissat siuarsaaneerillu piviusunngortinneqarnissaat pilersaarutaalerpata aningaasartuutissanik malitseqartinneqarnissaa naatsorsuutigineqarsinnaavoq.

Allaffeqarfiup naliliinera

Qeqqata kommunianit isumattorsaqatigiinnermi peqataatitsinera iluarisimaarneqarpoq pissarsiffiulluarlunilu suleriaqqinnissamut immersuutaalluarluni.

Innersuussut

Innersuussutigineqarpoq ilisimatitsissut tusaatissatut tiguneqassasoq.

Aalajangiineq

Tusaatissatut tiguneqarpoq

Ilanngussat

1. Isumattorsaqatigiinnermit imaqarniliaq
2. Naalackersuisut naapeqatiginissaanut anngutassat
3. Naalackersuisup naapeqatigiinnermit ilisimatitsissutaa (notat)

Imm. 11 Sisimiuni & Maniitsumi sunngiffimmi atuartitsinerup ineriartornera pillugu paassissutissiissut

Journalnr. 55.01.00

Tunuliaqutaq

Sunngiffimmi atuartitsineq tamanut ammasuuvoq, meeqqanut atuartussaataasunut kiisalu inersimasunut 19-ileereersimasuniit qummut ukiulinnut. Meeqqanut atuartunut eqimattaliortoqartarpoq ualikkut ingerlanneqartartunik, inersimasunullu atuartitsinerit nalinginnaasumik unnukkul nal. 19.00-miit aallartittarlutik, sammisalli ilai sapaatip akunnerata naanerani ingerlanneqartarlutik. Ukiuni siuliini meeqqanut inuusuttunullu sunngiffimmi atuartitsineq septemberimi aallartikkajut-tarput, tamanna fagini neqeroorutaasunut sorlernerut sunillu ilinniartitsinissamut nalunaarsimasut qassiuneri apeqqutaallutik aallartittoqartarluni.

Ukiut ingerlanerini neqeroorutit ilinniartitsinnaasullu arriitsumik ikiligaluttuinnavinnikuupput. Assersuutigalugu ukiumi atuarfiusumi 1999/2000-imi Sisimiuni fagini periarfissani tamani toqqagassat 39-unikuupput. 2013/14-imi 28-nik toqqagassaqaarnikuuvoq. 2016/17-imi unnukkul atuartitsineq toqqagassat 23-nit taakkunanit atuartitsissutit 14-it kisimik aallartippit. 2018/19-imi toqqagassanik neqerooruteqarneq faginut 19-inut appariarsimavoq aammalu fagit qulingiluaannaat ingerlanneqarnissaannut naammattunik nalunaartoqarsimalluni. 2019/20-mi fagit 17-it neqeroorutigineqarput, december/januar aallartinneraniilli holdit 8 naammattunik ilannguffigineqarsimammata aallartissinnaasimapput.

2018/2019-imi Maniitsumi unnukkul atuartitsinerumut toqqagassat 9-aasimapput. 12-it neqeroorutigineqarput meeqqanut.

Maleruagassatigut tunngavigisaaq

Kulturikkut ingerlatsineq sunngiffimmilu sammisaqartitsineq pillugit Inatsisartut inaaaaaatsisaat nr. 5, 6 juni 2016-imeersoq.

Pissutsit atuuttut

Ukiuumut atuarfiusumut 2019/20-mut Sisimiuni Sivdleq aamma Qeqqata.gl kiisalu Facebook aqutigalugit saqqummiinikkut 2019-imi septembarip aallartinnerani ilinniartitsisussarsiorluni sunngiffimmi pisortaq aallartippoq, unnukkul atuartitsinerumut aammalu atuartunut qinnuteqarfissaaq 2019-imi septembarip 18-ianut killilerlugu. Meeqqat atuarfiini sulisussarsiornerit atuarfiup intranetiini ikkunneqarpoq. Paasinarsimavorli ilinniartitsisut ikittuinnaat nalunaarsimasut, meeqqat atuarfiannut unnukkullu atuartitsinerumut. Taamaattumik ilinniartitsisussarsiornerumut nalunaarfissaaq oktobarip arfineq-aappaanut sivitsorneqarpoq. Kisianni suli nalunaartut ikippallaarmata, sunngiffimmi pisortaq Radio Tusataatigut apersorneqarpoq aammalu taanna arlaleriarluni aallakaateqqinneqarpoq. Tamatumalu kingorna aatsaat ilinniartitsisussanik naammattunik pissarsisoqarmat unnukkul atuartitsinissamut neqeroorutinut pilersaarut 2019-imi novembarip 27-ani Sivdleq aqutigalugu agguanneqarluni saqqummerpoq, pilersaarutaallunilu 2019-imi decembarip qulingiluaani unnukkul atuartitsineq aallartittussanngorlugu. Tamatuma kingorna unnukkul atuartitsineq 2020-mi apriliip 30-ata tungaanut ingerlassaaq.

Sisimiuni meeqqat atuarfiinut ajoraluartumik ilinniartitsinissamut ilinniartitsisoq ataasiinnaq nalunaarsimavoq, aammalu ilinniartitsisusimasunik kaammaattuinnikkut misiliisoqaraluarpoq, ajoraluartumilli iluatsitsiffiunngitsumik. Ilinniartitsisut ilai meeqqanik atuartitsisarneq ilunger-sunarnerulersimasooq oqariartuutigaat, tamatumani ullaarnaniit atuartitsereernikuusarlutik.

Taamaalilluni ajoraluartumik meeqqanut atuartunut 2019/2020-mut sunngiffimmi atuartitsinissamik holdinik pilersitsisoqanngilaq.

Inatsisartut inatsisaat nr. 5, 6. juni 2016-imeersoq malillugu, ikinnerpaamik inunnik arfineq-pingasunik nalunaartoqarsimatillugu sunngiffimmi atuartsineq aallartinneqartassaaq.

Ukioq atuarfiusumut 2019/2020-mi Maniitsumi pilerisaarutitut atorneqarput naqitat ingerlanneqartussat pisiniarfinnut ilillugit tigusassatut taavalu Facebook kiisalu Iloqarfimmi allagarsiineq.

Maniitsumi sunngiffimmi atuartitsinerup hold-it ingerlasut amerlanngillat soorlu tamanna Sisimiut assigalugu sunngiffimmi atuartitsinermik ingerlatsineq annikillinikuusoq.

Sunngiffimmi atuartitsinerup taama ikilileranut pequtaasinnaasut amerlasinnaapput. Ilaatigut ukiuni kingullerni interaktivi elektroniskikkullu innuttaasunit atuineq ingerlallualernikorujussuuvog, tassani Facebook il.il. inuit sammisassaani allangortitsinikorujussuullutik, taamaalilluni amerlasuut quppernertut paasissutissiisunut periarfissanut tamanut isersinnaanngornikuupput, kiisalu internet atorlugu aliikkusersornissaq taamannariaatinngornikuulluni, soorlu netflix assigisaanillu periarfissaqalernikuulluni. Assersuutigalugu maanna meeqqat atuartut tamarmik iPad-teqarput aammalu inuit amerlasuut qarasaasianik smartphonenillu peqarlutik. Taamaattumik sunngiffimmi atuartitsineq suleqatigiiffiusoq eqqarsaatiginissaa kiisalu siunissami tamatuma qanoq atuuteqar-tilersinnissaata paasiniarniarlugu piffissami aggersumi oqaluserineqarnissaa eqqarsaatigineqarsinnaasorinarpoq. Tamannali anguneqassappat atuisartut, ilinniartitsisut, atorfillit qinikkallu oqallissinneqarnissaat aqutissat ilagisinnaavaat.

Atuilluuntuunissakkut kingunerisinnaasai

Qeqqata kommuniani meeqqanut inersimasunullu sunngiffimmi atuartitsineq atuilluuntuuneruvoq, suliatigut piginnaasanik ilisimasanillu avitseqatigiissutaasarmata siammartinneqarlutillu.

Aningaasaqarnikkut allaffissornikkullu kingunerisinaasai

Sunngiffimmik atuartitsinermut tunngatillugu aningaasatigut kinguneqassanngilaq missingersuutini ilaareertarmata. Ukiut siuliini Sisimiuni tiimimmusialinnut aningaasarsiassarititat ilaatigut kukkusumik inissiinerit pissutaalluni atuineq qaangiisutut isikkoqartutut inissinneqarsimavoq. Soorlu 2017-imi konto 530116-imi qaammammusialinnut missingersuut annertoorujussuanngorsimasutut isikkoqarpoq (312.000 kr.) atuinerlu 0 %-iulluni, taavalu tiimimmusiallit annikitsuinnangorsimalluni (kr. 50.000) tassanilu atuineq 223,7%-iulluni. Ukiut allat eqqarsaatigalugit 2018-imi akissarsianut atuineq 71,9 %-imiippoq 2019-imilu atuineq 39%-imiilluni. Tassa ukiumiit ukiumut holdit qassiuineri apeqqutaallutik atuineq nikerartarpoq. Maniitsumiit sunngiffimmi atuartitsinermi ukiuni kingumut qiviarlugit annerusumik atuivallaartoqartarsimanngilaq. Soorlu assersutitut 2019-imi akissarsiassanut aningaasaliissutit konto 530120-mi 286.000 kr.-iniit 209.000 kr. atorneqarsimapput, tassa 73,2 %-imiillutik. Atuinerlu ukiuni kingullerni ikiliartorneri malugineqarsinnaavoq.

Allaffeqarfiup naliliinera

Paasissutissiisummi takuneqarsinnaasumik Qeqqata Kommuniani sunngiffimmi atuartitsineq annikilliarpoq, soorlu nuna tamakkerlugu aamma taamatut isikkoqalersimasoq. Taamaammat allaffeqarfiup naliliinermi siunissami sunngiffimmi atuartitsinerup ineriartortinnissaa pillugu atuisartunik (innuttaasunik), ilinniatitsisunik, atorfilinnik qinikkanillu peqataaffigineqartumik

oqallitsitsinikkut siunissami qanoq iliuusissanik qulaajaanissaq siunertaralugu oqallittoqarnissaa innersuussutigerusuppaat.

Innersuussut

Innersuussutigineqarpoq paasissutissiissut tusaatissatut tiguneqarluni allaffeqarfiup naliliinera naapertorlugu oqallitsitsinissaq siunnerfigineqassasoq.

Aalajangiineq

Tusaatissatut tiguneqarpoq.

Frederik Olsen siunnersuuteqarpoq:

Tarajorterinerit, tuttunniarnerit sunngiffimmi atuartitsinermi ilanngunneqarsinnaasut.

Ilanngussat

1. Sunngiffimmi atuartitsinissamut pilersaarut 2019-20 Sisimiuni
2. Sunngiffimmi atuartitsinissamut pilersaarut 2019-20 Maniitsoq

Imm. 12 Qeqqata Kommuniani Kultureqarnermut sunngiffimmullu immikkoortortamut Ukiumut nalunaarut 2019.

Journal nr. 55.01.00

Tunuliaqutaq

Qeqqata kommuniani Ilinniartitaanermut immikkoortortap ataani Kultureqarnermut sunngiffimmullu immikkoortortaq 2019-imi ukiumut nalunaarummik suliaqarpoq.

Maleruagassatigut tunngavigisaq

Kultureqarnermut aamma sunngiffimmi atuartitsineranut Inatsisartut Inatsisaat nr. 5, 6. juuni 2016-meersoq.

Pissutsit atuuttut

Immikkoortunut tamanut 2019-imut ukiumut nalunaarutiliortoqarpoq.

Maniitsoq

Atuakkanik atorniartarfik. 2019-imi atuakkanik atorniartarfik inunnit 5.282-init iserneqarpoq. 990-it internetsimik atuisimapput, 1004-llu Wi-Fi-mik atuisimallutik. Atuakkat 6.101-it atornerqarput.

Klubbi. Meeqqat atuisut arfineq-pingasuniit qulit tikillugit ukiullit 60-it nalunaarsorneqarput, inuusuttullu 14-21-nik ukiulinnut inuusuttunut klubbeqartitsilluni. Atuisut 20-23-t ataatsimoorsinnaasarput. Unnukkut atuisut agguaqatigiisillugit 20-30-t missaaniittarput. Ilaatigut inuusuttut sapaatip akunnerata naanerani 100-t isersimasinnaasarlutik. Ukioq nutaaq aallarnerfigalugu apersortittussat ammaaneqarput, allani sumiiffisaqannginnerat pisutaalluni.

Nipilersornermik ilinniarfik. Nipilersornermik ilinniarfiup Maniitsumi innuttaasut tamarluinnarmik anguniagaanut ilaapput, pigisalli killeqarneri patsisaallutik atuartut aallunnerusimavagut. Ukiap ingerlanerani inersimasunut killilimmik ammaassinikuuvuguttaaq. Ukiaq nipilersornermi ilinniarfimmi atuartunik kisitsisoqartarpoq. Atuartut tamaasa piunaffigineqarput maaniissimagaangamik tamatigut atitik allattassagaat. Inuit qassit aggartarnersut, taamatullu atuartut pulaartutullu qanoq agguataarsimanersut takuneqarsinnaaniassammata. Isertartuni pulaartut 261-iupput atuartullu 207-ullutik, ulluni ataasiakkaani pulaartut 18-niusarsimapput atuartullu 16-iullutik.

Katersugaasivik. 2019-imi Maniitsumi Katersugaasivimmi katillugit 1.256-it isersimapput. Uma kisitsisip umiarsuit takornariartaatit ikittuinnaat (pingasut) 2019-imi illoqarfimmut aqquasaarsimanerat takutippaa. Katersugaasivimmut pulaartartut amerlanerpaat tassaapput inuttaasut atuartullu.

Katersugaasiviup sulisuiniit ullut tamaasa illuutit nakkutigineqartarput, ajoqutillu annikitsut iluarsisinnaasarlugit.

Ikuallattoqartillugu qamitsissutissat qatserisartoqartuniit akuerisaapput, qimaaffissianillu ajoqersuutit takussutissiat ajunngitsumik inisseqqallutik. Tamatuma saniatigut katersugaasivik ABA-mik atortulersuuteqarpoq misissorqartartumik.

Katersugaasivik tillinniartoqartillugu kalerrisaarutitaarnikuuvoq (Visonic Powermaster-10), kalerrisaarilissappallu katersugaasiviup sulisuinut aalajangersimasunut nalunaartussaalluni.

Sisimiut

Atuakkanik atorniartarfik. Sisimiut atuakkanik atorniartarfianut isertut 8.404-pput atuakkallu atorqartut katillugit 5.022-ullutik. Internetsimut attaveqarpoq Wi-Fi-qarlunilu, qarasaasiat marluusut 1.674-init atorqarsimapput, Wi-Fi-lu akeqanngitsoq 1.933-init atorqarsimalluni.

Nipilersornermik ilinniarfik. Serravik-up siunissamut ungasinnerusumut takorluugaa tassaavoq, inuiaqatigiinni nipilersornermut ilinniarnermik nutaamik tunngaviliinissaq, anguniagaavorlu Sisimiuni meeqqat, inuusuttut inersimasullu akornanni nipilersornerup qaffassarnissaa. 2019-imi aggust-novembarimi meeqqerivinnut tamanut Serravik annertuumik suliniuteqarnikuuvoq, tusarnaartitsinermi naggaserneqartumik. Novembarimilu Sisimiut Timersortarfiani Unnuk Ataaseq Tusaamasanngorimik aqqissuusseqataasuulluni. Nipilersornermut ilinniarfik aqutsisup saniatigut, aalajangersimasunik marlunnik ilinniartitsisoqarpoq, taakkulu saniatigut timelærerinik atuisarluni. Inatsisartut inatsisaat nr. 5 6. Juni 2016-meersoq naaportorlugu, nalinginnaasumik sunngiffimmi aqqiissuteqarnermut malittarisassat naaportorlugit atuartitsineq aqqiissuunneqartarpoq.

Sisimiuni Kangerlussuarmilu Katersugaasiviit. Katersugaasiveqarnek pillugu Inatsisartut inatsisaat nr. 8, 3. juni 2015-imeersoq naaportorlugu Katersugaasivik sulivoq, Sarfannguit, itilleq Kangerlussuarlu akisussaaffeqarfigalugit. Katersugaasivimmi aqutsisumik, katersugaasivimmi ikiortimik (inspektør), katersugaasivimmi ikiortimik, allaffimmi ikiortimik katersugaasivimmilu paarsisumik sulisoqarpoq. 2019-imi katersat normui 130-t nalunaarsorneqarput, taakkulu pingaarnertut katersugaasivimmi katersugaataareersuullutik (2012-2017-imeersut). Katersugaasiviup illuutaata qanoq issusaat ajunngillat, katersugaasiviullu katersugaatai aamma qanoq issusaat ajorisassaanatik. Suliniummut *Activating ARctic Heritage Katersugaasivik suleqataavoq, katersugaasivimmilu aqutsisoq Assoviate Researcher-itut allassimalluni.*

Sukorsit. Pikkorissaanermut suleqatigiissitanullu tullinnguuttunut sulisut ilaatigut peqataasimapput: Think Inuk pikkorissarneq sulisunut marlunnut, Imminut toqunnissamik navianaateqartunut Oqaloqatiginninnissamut pikkorissarneq atorluarneqartoq, Klubbimi sulisunut pikkorissaaneq sulisunut marlunnut, Meeqqanut angerlarsimaffiup avataanut inissinneqarsimasunut Ilaqutariinnermut immikkoortortamik suleqateqarnek aammalu Ilaqutariinnik isumasioqatigiissitsinermi attaveqaatissamik pilersitsineq. 2019-ip aasaanerani inuusuttunut klubbi nuna tamakkerlugu Assaqutami aallaarsimaartitsinermut qaaqqusisuuvoq, tassanilu Kalaallit Nunaat tamakkerlugu inuusuttunit 20-nit peqataaffigineqarluni, Kattuffik SUKORSEQ-up aqqiissuussaafigisaanut.

Qooqa. Klubbimi nalinginnaasumik nerrivimmi arsaarneq, billard, nerrivimmi arsaaneq il.il. sammisaqartitsinerit saniatigut Qooqa makkuninnga neqerooruteqarpoq, nutaanik pilersitsivik sannavik kiisalu nipilersortarfimmi nipilersoqatigiinneq. Qaammammut nereqatigiinnermik, unammiaartitsinermik, aammalu timersortarfimmi naluttarfimmilu sammisaqartitsinerinik aqqiissuussisoqartarpoq. Ataatsimoortumik unnuisarnernik aamma aqqiussuussisoqartarpoq kiisalu nuannartaartitsinerinik aqqiussuussisoqartarluni. Ilaasortat 80-it missaaniipput. Sulisunik

attatiinnartitsiniarnermik ajornartorsiuteqarnek patsisaalluni, atorfiit amerlassusaannut akuerisani atorfik ataaseq perorsaasutut atorfitnut nutarterneqarpoq. Tamanna tunngavigalugu 2019-imi aggustip 15-iani Danmarkimeersumik perorsaasumik atorfinitsitsisoqarpoq. Suleqatigiinniarnermulli ajornartorsiuteqarnek patsisaalluni, perorsaasutut atorfininnikoq piffissami sivikitsuinnarmi atorfeqareersorlu sulinnaarallartinnerqarpoq, tamatumalu saniatigut aqutsisoq sivikitsumik piffissaliilluni soraarnissaminik kalerriivoq. Tamanna tunngavigalugu sulisoqarniarnikkut ajornartorsiortoqarsimavoq kiisalu ukiup sinneranut aqutsisussaaleqisoqarluni.

Sunngiffimmi atuartitsineq Akunnermusialimmik perorsaanikkut ikiorteqarnikkut 2018/19-mut pilersaarusiorneq kingusissukkut ingerlanneqarpoq, 2019-imi januaarimi aatsaat aallartilluni, apriilillu naajartornerani naammassilluni. Nuannaarniutigalugu imaatigut angalasunut aammalu VHF/DSC kalaallisut piukkunnassutsimut misilitsinnerit naammassineqarput. Atuartitsissutissatut assigiinningsut 23-t neqeroorutigineqarput, sunngiffimmilu atuartitsinissamut atuartitsissutitut qulingiluanut naammattunik nalunaartunik pissarsisoqarluni. 2019-20-mi perorsaanikkut ikiorteqartoqanngilaq, taamaalillunilu sunngiffimmi pisortap sunngiffimmi atuartitsinissaq kisimi isumagisussanngorlugu, sunngiffimmilu atuartitsineq 2019-imi decembarimi aallartinneqarpoq.

Atuilluartuunissakkut kingunerisinnaasai

Meeqqat illersuisuata nalunaarusiaanut atatillugu atuilluartuuneruvoq, silami atortorissarutitut aningaasaliissutit qaffaavigineqarneratigut suliniutit amerlineqarmata.

Aningaasaqarnikkut allaffissornikkullu kingunerisinaasai

Taasassaqartoqanngilaq

Allaffeqarfiup naliliinera

Ukiumut nalunaarusiornissamut skabeloni sapinngisamik atorneqarsimavoq.

Innersuussut

Ilinniartitaanermut Peqqinnissamut Sunngiffimmi sammisanut Kultureqarnermullu ataatsimiititaliap tusaatissatut tigussagai.

Aalajangiineq

Erinarsoqatigiinnik aqutsisinnaaneq, qilaatersornermik ilinniarneq.

Nipilersornermi ilinniarfinni marluusunni siammasinnerusumik ingerlatsisoqassasoq ataatsimiititaliamit kissaatigineqarpoq.

Ilanngussat

1. Atuakkanik atorniartarfik (Man.)
2. Maniitsup Katersugaasivia (Man.)
3. Nipilersornermik atuarfik (Man.)
4. Sukisaarsrtarfik (Man.)
5. Atuakkanik atorfiartarfik (Sis.)
6. Nipilersornermik atuarfik (Sis.)
7. Sisimiut & Kangerlussuup katersugaasivia (Sis.)
8. Sukorsit (Sis.)

Imm. 13 Maniitsumi Sisimiunilu Majoriap ataani kollegiet ingerlanneqarnerannut nalimmassaanermi killiffimmik paasissutissiissut.

Journal nr. 09.00

Tunuliaqutaq

Inuussutissaqarnermi suliffissaqartitsinermilu ataatsimiititaliaasimasup kissaatiginikuuvaa, Maniitsumi Sisimiunilu Majoriap ingerlanneqarneranut matumani kollegiet aamma ingerlanneqarnerannut tunngatillugu naleqqussaasoqassasoq. Suliaq pilersaarusiorneqareerluni 2018-ip ingerlanerani aallartinneqartussaagalarpoq, kisiannili pissutsit assigiinngitsut pequtugalugit matumani centerlederit atorfeqartut allanngortarnerat aamma pequtugalugit, suliaq pilersaarusiorniarnera pissusissaatut ingerlasimangilaq. Massakkulli illoqarfiit marluusuni centerlederit aalajangersimasunik inuttaqalernikuunerat tunngavigalugu, naleqqusaaissamik suliaq ingerlateqqinneqalerpoq, siullertullu aallartiffiqineqarluni illoqarfinni marluusuni kollegiat ingerlanneqarnerat.

Suliaq pilersaarusiorneqarnerata killiffissiorneqarnera nangillugulu ingerlaqqinnissaanut tunngatillugu matumani paasissutissiissutitut ullumikkut ataatsimiititaliamut Majoriap ataaniiffigisaanut, Ilinniartitaanermi ataatsimiititaliamut saqqummiunneqarpoq.

Maleruagassatigut tunngavissat

- Ilinniartut ineqarfii pillugit Inatsisartut inatsisaat nr 42, 12 december 2019-imeersoq
- suliffissanut ilitsersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaat nr 28, 9 december 2015

Pissutsit atuuttut

Maniitsumi Sisimiunilu kollegiet ingerlanneqarnerat pillugu naleqqusaaanermik suliaq pilersaarusiortulugu aallartisarniarlugu, centerlederit oqarasuaatikkut oqaloqatigiinnikuupput isumaqatigiissutugalugulu suliaq qanoq pilersaarusiorneqassanersoq. Kollegiet ingerlanneqarnerani assigiinngissutsit paasilluarumallugit, allakkat pappilissallu immersortakkat Maniitsumi Sisimiunilu atorneqartartut centerlederitut nassiunneqarput, taamalillugu sutigut naleqqusaaanissaq takulluarsinnaajumallugu. Isumaqatigiissutaareerpoq, centerlederit sapaatip akunnera 18-imi telefonikkut ataatsimeeqatigiinnissaat, tassani nangittumik kollegiet ingerlanneqarnerannut tunngatillugu, siunissami assigiissumik ingerlariaaseqarnissaq aammalu allakkat immersuiffissallu atorneqartartut assigiissarnissaat pillugit eqqartueqatigiiffiussalluni.

Ataatsimiititaliamut ilisimatitsissutigineqassaaq, Sisimiuni kollegiet inissiaammata paarlattuanillu Maniitsumi illu angisooq ineeqqanut 26-inut agguarnilik ataatsimoorussamillu igaffilik, uffarfilik, perusersartarfilik kiisalu ini isersimaartarfilik.

Kollegiet najugaqarfigineqarsinnaanerit tunngatillugu periarfissat assigiinngikkaluartut, taamaattoq ineqarnermi akiliutaasartoq assigiippoq, tamatumani nuna tamakkerlugu kollegieni akigitinneqartartut aallaavigineqarmata, taamaalilluni Kalaallit nunatta iluani kollegieni najugaqarnermi akigitinneqartartunut sungiussisimareernissaat pingaartillugu.

Atuilluartuunissakkut kingunerisinnaasai

Naleqqussaanermut tunngatillugu atuilluartuunerussaaq, Maniitsumi Sisimiunilu kollegiet ingerlanneqarnerannut tunngatillugu allaffissornerit suleqatigiissutigineqarnerat oqinnerulersitsissammat.

Aningaasaqarnikkut allaffissornikkullu kingunerisinnaasai

Assigiimmik immersuiffissanik atunerup kingunerissavaa, aningaasaqarnermi immikkoortortamik suleqateqarnerup oqinnerusumik ingerlanissaa.

Allaffeqarfiup naliliinera

Alleqarfiup nalilerpaa, Kollegiet ingerlanneqarnerannut tunngatillugu naleqqussaanerit allaffissornermilu atortunik assigissaarinerit suliat pisariinnersumik naammassineqartarnissaannik oqinnerulersitsissasoq. Taamaattumik aamma pingaarpoq matuma kingorna, Majoriap iluani suliat allat naleqqussarneqarnissaat.

Innersuussut

Suliaq Ilinniartitaanermi ataatsimiititaliamut paasissutissatut saqqummiunneqarpoq innersuussutigalugu tusaatissatut tiguneqassasoq.

Aalajangiineq

Tusaatissatut tiguneqarpoq.

Ilanngussat

1. Allagartat immersortakkat allakkallu Maniitsumi atorneqartartut
2. Allagartat immersortakkat allakkallu Ssimiuni atoneqartartut

Imm. 14 Qeqqata Kommuniani suliffissaaleqineq pillugu paasissutissiissut

Journal nr. 65.15.00

Tunuliaqutaq

Ilinniartitaanermi ataatsimiititaliap kissaatigivaa Qeqqata Kommuniani suliffissaaleqineq malinnaaffigerusullugu tassungalugu atatillugu aalajangerpoq, suliffissaaleqinermi kisitsitsisitali ataatsimiititaliap ataatsimiinnerani paasissutissiissutitut ilaajuaannalissasut.

Maleruagassatigut tunngavissat

- Suliffissanut ilitersuisarnernut pikkorissaqqinnernullu qitiusumik ingerlatsiviit pillugit Inatsisartut inatsisaat nr. 28 decemberip 29-ani 2015-imeersoq.
- Majorianik ingerlatsinermi naammassisassanut isumaqatigiissut pillugu Namminersorlutik Oqartussat Qeqqatalu Kommuniani isumaqatigiissut
- Kommunit aquneqarnerat pillugu Inatsisartut inatsisaat nr. 14 decemberip 15-ani 2018-meersoq
- Suliffissarsiorneq pillugu Inatsisartut peqqussutaat nr. 10 decemberip 18-ani 2003-meersoq

Pissutsit atuuttut

Majoriami suliat kivinneqartussat inatsisit atuuttut tunngavigalugit Namminersorlutik Oqartussat Kommunillu akunneranni isumaqatigiissuteqarnikkut ingerlanneqartarput. Sisimiuni Maniitsumilu Majoriami suliaasat, Qeqqata Kommunianut ataatsimoorussamik isumaqatigiissuteqarnikkut naammassiniarneqartarput. Isumaqatigiissut ukiut tamaasa nutarterneqartarpoq.

Isumaqatigiissummi pingaarnertut anguniagassat tassaapput;

- Innuttaasut ilinniarsimassusiat annertunerulersissallugu
- Suliffissaaleqineq annikinnerulersissallugu
- Sulisinnaasut piginnaanerisa nukittorsarneqarnissaat/annertusarneqarnissaat sulissutigissallugu

Suliniutit Majoriami ukkatarineqartartut tassaasarput:

- Suliffissaaleqisunik piginnaanngorsartitsinermik suliffeqarfiit suleqatigalugit ingerlatitsinerit
- Ilinniagaqalernissamik aqqutissiuussinerit
- Piginnaasatigut qaffatitsiniarluni pikkorissarnernut peqataatitsinerit
- Aqqutissiuussilluni kajumilersitsiniaanermik ingerlataqarneq (vm-forløb).

Qulaani suliaasat saqqummiussat tunngavigalugit, innuttaasut suliffissarsiorlutik saaffiginnittartut nalunaarsorneqartarput saaffiginnissutaallu aallaavigalugu iliuusissamik pilersaarusiortinneqartarlutik.

Sisimiuni suliffissarsiorlut 45-ut oqaloqatigineqarnikuupput, iliuusissamik pilersaarusiortitsinissaq siunertaralugu.

Maniitsumi suliffissarsiorlut 56-it oqaloqatigineqarnikuupput, iliuusissamik pilersaarusiortitsinissaq siunertaralugu.

Imaqarniliaq Ilinniartitaanermut ataatsimiititaliap Maj-ip. 04-ani 2020-imi ileqquusumik ataatsimiinnera 04/2020

Innuttaasut suliffissarsiortutut nalunaarsortinniarlutik saaffiginnittut nalilersuinermit matchgruppenut agguataarneqartarput, soorlu eqitsimmi ataani takuneqarsinnaasumi:

	Sisimiut		Maniitsoq	
	Arnat / Kvinder	Angutit / Mænd	Arnat / Kvinder	Angutit / Mænd
Match gruppe 1	67	119	56	80
Match gruppe 2	26	16	20	20
Match gruppe 3	25	20	15	33

Suliffissarsiortutut nalunaarsortittut aallaavigalugit suliffissaaleqinerup nikerarnera malinnaaffigineqartarpoq, matumanilu ataatsimiititaliap malinnaaffiginnikkusunnera tunngavigalugu 2020-imi januarimiit marts-i ilanngullugu eqitsimmi saqqummiunneqarput, tamatumani 2019-imi piffissap taamaalinerani suliffissariortutut nalunaarsortissimasut kisitsisaataannut sanillersuullugit takussutissarineqarlutik.

	Marts 2020	Marts 2019	nikingassut
Sisimiut	232	213	19
Kangerlussuaq	10	3	7
Itilleq	17	14	3
Sarfanguit	16	16	0
Maniitsoq	182	158	24
Kangaamiut	21	7	14
Napasq	2	1	1
Atammik	25	26	-1
I alt	505	438	67
Procentinngorlugit	7,68%	6,61%	
Innutaasut sulisinnaasut	6.579	6.627	-48

2020-imi piffissami tamatumani 2019-imut sanilliussermi, Qeqqata Kommuniani suliffissaaleqineq 67-inik qaffariaateqarsimavoq.

Eqitsimmi matumani takussutissiarineqarpoq, suliffissarsiortunit qassit piginnaanngorsartinneqarlutillu flexjob-ertinneqarnerisut:

	Revalidering	Flexjob
Sisimiut	5	6
Maniitsoq	9	0

Illoqarfinni marluusuni piginnaanngorsartitsinerit amerlisarniarlugit suliniutit ingerlatinneqarput.

Imaatigut isumannaallisaanermut, PKU aamma AMA kiisalu imaatigut inuussutissarsiortunermi allagartaqalersitsiniarnermi pikkorissarnernut Sisimiuniit inuit 52-it peqataatinneqarput. Tamatuma saniatigut Sisimiunit peqataaffigineqartumit Allround servicemedarbejderitut pikkorissarnerit ingerlanneqartussaagaluartut Corona pequtugalugu unitsinneqarpoq.

Maniitsumi suliffissarsiortunit pikkorissarnernut assigiinngitsunut qinnuteqaatit 20-it tiguneqarnikuupput. Qalissialiornermi-, maskinfører surface mining kiisalu imaatigut isumannaallisaaneq pillugu pikkorissaanerit Maniitsuminngaannit inunnit 4-anit

Imaqarniliaq Ilinniartitaanermut ataatsimiititaliap Maj-ip. 04-ani 2020-imi ileqquusumik ataatsimiinnera 04/2020

peqataaffigineqartut ingerlanneqarnikuupput. Pikkorissaanissat pilersaarutaareersut arlaqartut Corona pillugu taamaatinneqarnikuupput.

Piffissami 1. januar-imiit marts 2020-ip naanissaata tungaanut suliffeqarfinnut assigiinngitsunut suliffissarsiortunik innersuussinerit eqitsimmi ataani takuneqarsinnaapput:

Suliffinnut innersuussinerit Anvisninger	Januar	Februar	Marts
Sisimiut	28	11	3
Maniitsoq	30	49	19

Aqqutissiorluni kajumilersitsiniarlunilu (vm-forløb) ingerlatassatut pilersaarutit illoqarfinni marluusuni taamaatiinneqarput Corona pillugu inissisimaneq patsisigalugu. Maniitsumi vm-forløb-ip tullia juli/august-imi ingerlanneqartussatut pilersaarutaavoq.

Aningaasaqarnikkut allaffissornikkullu kingunerisinnaasai

Suliffissaaleqinerup aningaasatigut kingunerisinnaasai tassaasinnaapput ilaqutariinnermi immikkoortortami pisortatigut ikiorsiissutinik tunniussisarneq aammalu Majoriami sulinngiffeqarallarnersiutinik tunniussisarneq. Taamaakkaluartoq suliffeqarfinnik suleqatigiinninnerup annertusarneqarnissaanik ukkassinerit suli ingerlanneqarput, innuttaasut suliffissarsiortutut nalunaarsortissimasut suliffinni sungiusartinneqartarnissaat aammalu piginnaangorsartinneqartarnissaat annertunerulersinniarlugit taamaalilluni imminut pilersorsinnaaneq annertunerulersinniarlugu aammalu Qeqqata Kommuniiani aningaasatigut kingunerisinnaasat eqqarsaatigalugu ikiorsiissutinik tunniussisarnerit minnerulersinniarlugu.

Allaffeqarfiup naliliinera

Allaffeqarfiup nalilerpaa suliffissaaleqinerup appartinniarnerni suliniutit ingerlanneqartut naammaginartut, taamaattorli pingaaruteqartoq, suliniutit ingerlannerini suliffeqqarfiit suleqatigilluarneqarnissaat. Taamaalilluni innersuunneqarpoq suliffissaaleqineq pillugu paasissutissiissut tusaatissatut tiguneqassasoq.

Innersuussut

Ilinniartitaanermi ataatsimiititaliamut innersuussutigineqarpoq paasissutissiissut tusaatissatut tigoqqullugu.

Aalajangiineq

Tusaatissatut tiguneqarput

Ilanngussat

1. Suliffissaaleqisunut kisitsisinik nalunaarsuineq marts 2020 naaneranut
2. Suliffissaaleqineq 03-2020

*Imaqarniliaq Ilinniartitaanermut ataatsimiititaliap Maj-ip. 04-ani 2020-imi ileqquusumik
ataatsimiinnera
04/2020*

Imm. 15 Tamalaat

**GIF aammalu Unicef pisinaatitaaffiit meeqqat atuarfianni saaffiqineqarneq
toqqammavigalugu Rettighedsskoler pilersinneqarpoq.**

Ataatsimiinneq naavoq nal.: 10:48